

唐詩紀事

唐詩紀事卷第七

高正臣

崔知賢

韓仲宣

周彥昭

高球

弓嗣初

高瑾

王茂時

徐皓

長孫正隱

高紹

郎餘令

陳嘉言

周彥輝

高嶠

周思鈞

劉友賢

于季子

東方虬

駱賓王

盧照隣

王勃 勳勳

楊炯

田遊巖

高正臣

晦日置酒林亭詩云正月符嘉節三春翫物華忘懷寄罇酒陶性狎山家  
柳翠含煙葉梅芳帶雪花光陰不相借遲遲落景斜

晦日重宴云芳辰重遊衍乘景共追隨班荆陪舊識傾蓋得新知水葉分  
蓮沼風花落柳枝自符河朔趣寧羨山陽池

正臣廣平人官至衛尉卿習右軍書法睿宗最愛其筆

晦日宴高氏林亭凡二十一人皆以華字為韻子昂為之序曰有渤海之

宗英是平陽之貴戚發揮鳳臺而嘯侶幽贊鷄川而留宴又曰冠纓濟濟多延戚里之賓鸞鳳鏘鏘自有文雅之客

晦日重宴八人皆以池字爲韻周彥暉爲之序上元夜効小庾體詩六人以春字爲韻長孫正隱爲之序

### 崔知賢

晦日林亭云上月河陽地芳辰景望華綿蠻變時鳥昭曜起春霞柳搖風處色梅散日前花淹留洛城晚歌吹石崇家

上元夜効小庾詩云今夜啓城闔結伴戲芳春鼓聲撩亂動風光觸處新月下多遊騎燈前饒看人歡樂無窮已歌舞達明晨

### 韓仲宣

晦日林亭云欲知行有樂芳罇對物華地接安仁縣園是季倫家柳處雲疑葉梅間雪似花日落歸途遠留與伴煙霞

晦日重宴詩云鳳苑先吹晚龍樓夕照披陳遵已投轄山公正坐池落日

催金奏飛霞送玉卮此時陪綺席不醉欲何爲

上元夜効小庾體云他鄉月夜人相伴看燈輪光隨九華出影共百枝新  
歌鍾盛北里車馬沸南隣今宵何處好惟有洛城春

周彥昭

晦日林亭云勝地臨鷄浦高會偶龍沙御柳驚春色仙筇掩月華門邀千  
里馭杯泛九光霞日落山亭晚雷送七香車

高球

晦日林亭云溫洛年光早皇州景望華連鑣尋上路乘興入山家輕苔網  
危石春水架平沙賞極林塘暮處處起煙霞

弓嗣初

晦日林亭云上序春輝麗中園物候華高才盛文雅逸興滿煙霞參差金  
谷榭皎鏡碧塘沙蕭散林亭晚倒戴欲還家

晦日重宴云年華藹芳隰春溜滿新池捉賞依三友延歡寄一卮鳥聲隨

管變花影逐風移行樂方無極淹留惜晚曦

嗣初咸亨二年第一人登第

高瑾

晦日林亭云試入山亭望言是石崇家二月風光起三春桃李華鶯吟上  
喬木鴈往息平沙相看會取醉寧知還路賒

晦日重宴云忽聞鶯響谷於此命相知正開彭澤酒來向高陽池柳葉風  
前弱梅花影處危賞洽林亭晚落照下參差

上元夜效小庾體云初年三五夜相知一兩人連鑣出巷口飛轂下池滑  
燈下恰似月人面併如春遨遊終未已相歡待日輪

瑾士廉之孫登咸亨元年進士第

王茂時

晦日林亭云勝踐尋良會乘春翫物華還隨張放友來向石崇家止水分  
巖鏡開庭枕浦沙未極清泉賞參差落照斜

徐皓

晦日林亭云綺筵乘暇景瓊醕對年華門多金埒騎路引璧人車蘋早猶  
藏葉梅殘正落花藹藹林亭晚餘興促流霞

長孫正隱

晦日林亭云梅晚屬煙霞遨遊重歲華歌鍾雖戚里林藪是山家細雨猶  
開日深池不漲沙淹留迷處所巖岫幾重花

上元夜效小庾體詩云薄晚嘯遊人車馬亂驅塵月光三五夜燈焰一重  
春煙雲迷北闕簫管識南隣洛城終不閉更出小平津

正隱序上元之遊云九谷帝畿三川奧域交風均露上分朱鳥之躔泝洛  
背河下鎮蒼龍之闕多近臣之第宅卽瞰銅街有貴戚之樓臺自連金穴  
美人競出錦幃如霞公子交馳雕鞍似月同遊洛浦疑尋稅馬之津爭渡  
河橋似向牽牛之渚實昌年之樂事令節之佳遊者焉

高紹

晦日林亭云嘯侶入山家臨春翫物華葛絲調綵水桂醕酌丹霞岸柳開  
新葉庭梅落早花興洽林亭晚方還倒戴車

紹爲考功郎中

郎餘令

晦日林亭云三春休晦節九谷泛年華半晴餘細雨全晚澹殘霞樽開踈  
竹葉管應落梅花興闌相顧起流水送香車

餘令定州人博學擢第授霍王元軌府參軍事從父知年亦爲王友元軌  
每日郎家二賢皆入府不意培塿而松栢爲林也改著作郎卒

餘令善畫唐祕書省內落星石薛稷畫鸚賀知章草書餘令鳳相傳爲四  
絕元和中韓公武爲校書郎挾彈中鶴一眼乃謂之五絕

陳嘉言

晦日林亭云公子申敬愛攜朋翫物華人是平陽客地卽石崇家水文生  
舊圃風色滿新花日暮連歸騎長川照晚霞

晦日重宴云高門引冠蓋下客抱支離綺席珍羞滿文場藻翰摘莫華彫  
上月柳色藹春池日斜歸戚里連騎勒金羈

上元夜效小庾體云今夜可憐春河橋多麗人寶馬金爲絡香車玉作輪  
連手窺潘掾分頭看洛神重城自不掩出向小平津

武后時酷吏也中宗神龍中詔酷吏陳嘉言等其身已死自垂拱已來枉  
濫殺人有官者並令削奪開元中御史程行謨奏酷吏來子均等二十三  
人情狀尤重子孫不許與官陳嘉言魚承曄皇甫文備傅遊藝四人情狀  
稍輕子孫不許近任

周彥輝

晦日林亭云砌莫收晦魄津柳競年華旣狎忘筌友方淹投轄車綺筵迴  
舞雪瓊醕泛流霞雲低上天晚絲竹帶風斜

晦日重宴云春華歸柳岸晦景落萸枝置驛銅街石開筵玉浦陞林煙含  
障密竹雨帶珠危興闌巾倒戴山公下習池



彥輝登咸亨五年進士

高嶠

晦日林亭云飛歡寫春望開宴坐汀沙積溜含苔色晴空蕩月華歌入平陽第舞對石崇家莫慮能騎馬投轄自停車

晦日重宴云駕言尋鳳侶乘歡俯鴈池班荆逢舊識斟桂喜深知紫蘭方出逕黃鶯未轉枝別有陶春日青天雪霧披

嶠爲司門郎中

周思鈞

北門學士思茂之弟也武后時爲太子文學劉禕之賜死在獄上疏自陳臨誅洗沐神色自若自捉筆爲表詞懇哀到思鈞悵歎其文后惡之貶楊州司倉參軍

和高氏林亭晦日文宴云早春驚柳毳初晦掩萸華騎出平陽里筵開衛尉家竹影含雲密池紋帶雨斜重惜林亭晚上路滿煙霞

重宴又云綺筵乘晦景高宴下陽池濯雨梅香散含風柳色移輕塵依扇  
落流水入絃危勿顧林亭晚方歡雲霧披

思鈞以中書舍人卒子瑛爲單父令瑛以女適武就生靖安丞相元衡

### 劉友賢

晦日林亭云春來日漸賒琴酒逐年華欲向文通徑先游武子家池碧新  
流滿巖紅落照斜興闌情未極步步惜風花

已上並高氏林亭之客外陳子昂張錫王勔解琬各載其門

### 于季子

漢高祖云百戰方夷項三章且代秦功歸蕭相國氣盡戚夫人

詠雲詩云瑞雲千里映祥輝四望新隨風亂鳥足汎水結魚鱗布葉疑臨  
夏開花詎待春願得承嘉景無令掩桂輪

季子登咸亨進士第

### 東方虬

詠春雪云春雪滿空來觸處似花開不知園裏樹若箇是真梅

陳子昂寄東方左史脩竹篇序云文章道弊五百年矣漢魏風骨晉宋莫傳然而文獻有可證者常觀齊梁詩彩麗競繁而興寄都絕每以永歎昨見明公孤桐篇骨氣端翔音韻頓挫光英明韻有金石聲遂用洗心收視發揮幽鬱不圖正治之音復覩於茲

虬武后時爲左史嘗曰百年後可與西門豹作對

### 駱賓王

帝京篇云山河千里國城闕九重門不覩皇居壯安知天子尊皇居地里  
嶠函谷鶉野龍山侯甸服五緯連影集星躔八水分流橫地軸秦塞重關  
一百二漢家離宮三十六桂殿陰岑對玉樓椒房窈窕連金屋三條九陌  
麗城隈萬戶千門平旦開復道斜通鳩鵲觀交衢直指鳳凰臺劍履南宮  
入簪纓北闕來聲明冠寰宇文物象昭回鈎陳肅蘭戾璧沼浮槐市銅羽  
應風迴金莖承露起校文天祿閣習戰昆明水朱邱枕平臺黃扉通戚里

平臺戚里帶崇墉灼金饌玉待鳴鐘小堂綺帳三千萬大道青樓十二重  
寶蓋彫鞍金絡馬蘭窗繡柱玉盤龍綺柱璇題粉壁映鏘金鳴玉王侯盛  
王侯貴人多近臣朝遊北里暮南鄰陸賈分金將讌喜陳遵投轄尙留賓  
趙李經過密蕭朱交結親丹鳳朱城白日暮青巾繡幃紅塵度俠客珠彈  
垂楊道倡婦銀鉤采薪路倡家桃李自芳菲京華遊俠盛輕肥延年女弟  
雙飛入羅敷使君千騎歸同心結縷帶連理織羅衣春朝桂樽樽百味秋  
夜蘭燈燈九微翠幌珠簾不獨映清歌寶瑟自相依且論二八千金是寧  
知四十九年非古來榮利若浮雲人生倚伏信難分始見田竇相移奪俄  
聞衛霍有功勳未厭金陵氣先開石槨文朱門無復張公子灞亭誰畏李  
將軍相顧百齡皆有待居然萬化咸應改桂枝芳氣已銷亡栢梁高宴今  
何在莫矜一旦擅豪華自言千載長驕奢倏忽搏風生羽翼須臾失浪委  
泥沙黃雀徒巢桂青門遂種瓜黃金銷鑠素絲變一貴一賤交情見紅顏  
宿昔白頭新脫粟布衣輕故人故人有湮淪新知無意氣灰死韓安國羅

傷翟庭尉已矣哉歸去來馬卿辭蜀多文藻楊雄仕漢乏良媒三冬自矜  
成足用十年不調幾遭迴汲黯薪逾積孫弘閣未開誰惜長沙傅獨負洛  
陽才

世稱王楊盧駱楊盈川之爲文好以古人姓名連用如張平子之略談陸  
士衡之所記潘安仁宜其陋矣仲長統何足知之號爲點鬼簿賓王文好  
以數對如秦地重關一百二漢家離宮三十六人號爲算博士

帝京篇曰倏忽搏風生羽翼須臾失浪委泥沙賓王後與徐敬業興兵揚  
州大敗逃死此其讖也

宋之問貶黜放還至江南遊靈隱寺夜月極明長廓行吟曰鷺嶺鬱岿嶢  
龍宮鏤寂寥句未屬有老僧點長明燈問曰少年夜久不寐何耶之問曰  
適偶欲題此寺而興思不屬僧請吟上聯卽曰何不云樓觀滄海日門對  
浙江潮之問愕然訝其適麗又續終篇曰桂子月中落天香雲外飄捫羅  
登塔遠剝木取泉遙霜薄花更發冰輕葉互凋待入天臺路看余渡石橋

遲明更訪之則不復見矣寺僧有知者曰此賓王也

詠月云忌滿光先缺乘昏影暫流既能明似鏡何用曲如鉤

賓王義烏人七歲能賦詩武后時數上疏言事除臨海丞鞅鞅不得志棄官去徐敬業亂以爲府屬敬業爲檄武后罪后讀但嘻笑至一杯之土未乾六尺之孤安在瞿然曰誰爲之或以賓王對后曰宰相安得失此人敬業敗亡命不知所之中宗時詔求其文得數百篇

賓王七歲詠鵝云鷺鷥曲頂向天歌白毛浮淥水紅掌撥清波

### 盧照隣

結交少年場云長安重遊俠洛陽富才雄玉劍浮雲騎金鞭明月弓鬪鷄通渭北走馬向關東孫賓遙見待郭解暗相通不受千金爵誰論萬里功將軍下天上虜騎入雲中烽火夜似月兵氣曉成虹橫行徇知己負羽遠征戎龍旌昏朔霧烏陣卷寒風追奔瀚海咽戰罷陰山空歸來謝天子何如馬上翁

詠史云昔有平陵男姓朱名阿游直髮上衝冠壯氣橫三秋願請斬馬劍  
先斷佞臣頭天子玉檻折將軍丹血流捐生不肯拜視死其若休歸來教  
鄉里童蒙遠相求弟子數百人散在十二州三公不敢吏五鹿何能誅名  
與日月懸義與天壤儔何必疲執戟區區在封侯偉哉曠達士知命固不  
憂

季生昔未達身辱功不成髡鉗爲臺隸灌園變姓名幸逢滕將軍兼遇曹  
丘生漢祖廣招納一朝拜公卿百金孰爲重一諾良匪輕廷議斬樊噲羣  
公寂無聲處身孤且直遭時坦而平丈夫當如此唯唯何足榮

大漢昔云季小人道遂振玉帛委闔尹斧鑕嬰搢紳邈哉郭先生卷舒得  
其真雍容謝朝廷譚笑獎人倫在晦不絕俗處亂不爲親諸侯不得友天  
子不得臣冲情甄負甌重價折角巾悠悠天下士相送洛橋津誰知仙舟  
上寂寂無四隣

公業負奇志交結盡才雄良田四百頃所食常不充一爲侍御史慷慨說

何公何公何爲敗吾謀適不同仲穎恣殘忍廢誠良在躬死人如亂麻天子如轉蓬干戈及黃屋荆棘生紫宮鄭生運其謀將以清國戎時來命不遂脫身歸山東凜凜千載下穆如懷清風

元日述懷云筮仕無中秩歸耕有外臣人歌小歲酒花舞大唐春草色薰三徑風光動四隣願得長如此年年物候新

七夕泛舟云汀葭肅徂暑江樹起初涼水疑通織室舟似泛仙潢連橈渡急響鳴棹下浮光日晚菱歌唱風煙滿夕陽

鳳杼秋期至鳧舟野望開微吟翠塘側延想白雲隈石似支機罷查疑犯宿來天潢殊漫漫日暮獨悠哉

照隣字昇之范陽人調新都尉病去官足攣一手又廢乃居具茨山下自以爲高宗尙吏已獨儒武后尙法已獨黃老后封嵩山屢聘賢士已獨廢著五悲文以自明病旣久與親屬訣自沈穎水

王勃 勸 勵



裴行儉在吏部見蘇味道王勣曰二君後皆掌銓衡李敬玄盛稱王勃楊  
炯盧照隣駱賓王行儉曰勃等雖有才然浮躁銜露豈享爵祿者炯頗沉  
默可至令長餘皆不得其死

勣晦日宴高氏林亭詩云上序披林館中京視物華竹窗低露葉梅逕起  
風花景落春臺霧池侵舊渚沙綺筵歌吹晚暮雨泛香車

勃爲文先磨墨數升引被覆面而臥忽起書之初不加點時謂腹藁滕王  
閣記落霞孤鶩之語至今稱之其詩甚多如畫棟朝飛南浦雲珠簾暮捲  
西山雨上巳云綠齊山葉滿紅曳片芝銷九日云蘭氣添新酌花香染別  
衣又詠風云肅肅涼景生加我林壑情驅煙入洞戶卷霧出山楹去來固  
無跡動息如有情日落山水靜爲君起松聲最有餘味真天才也

勣開元中任中書舍人先是五王出閣同日受册有司忘載册文百官在  
列方知闕禮勣召五吏執管授一時俱畢

勃爲沛王府修撰時諸王鬪鷄勃戲爲文檄英王鷄高宗曰是且交觀斥

出府勃既廢官劍南嘗登葛憤山曠望慨然思諸葛之功賦詩見情爲虢州參軍坐罪除名父福時以左遷交趾令勃往省度海溺水瘁而卒年二十九勳勗以事坐誅

楊炯

夜送趙縱云趙氏連城璧由來天下傳送君還舊府明月滿秦川

張燕公贈別盈川箴云杳杳深谷森森喬木天與之才或解其祿君服六藝道德爲尊君居百里風化之源才勿驕恠政勿苛煩明神是福而小人不寃畏其不畏存其不存作誥茲酒成敗之根勒銘其口禍福之門雖有韶夏勿棄擊轅豈無車馬敢贈一言

炯華陰人永隆二年皇太子已釋奠求豪俊充崇文館學士後爲盈川令說以箴贈行戒其苛至官果以嚴酷稱不爲人所多卒官中宗時贈著作郎

田遊巖

遊巖云洪農清巖曲有磐石可坐宋十一每拂拭待余寄詩贈之云信彼稱靈石居然狎遁棲徘徊承翠巘斌駁帶深溪夕陰起層岫清景半虹蜺風來應嘯阮波渡可琴嵇僕也潁陽客望彼空思齊儻見山人至簪蒿且杖藜

宋之問答云家臨清溪水溪水繞磐石綠羅四面垂鬢髮百餘尺風泉度絲管苔蘚鋪茵蓆傳聞潁陽人霞外漱靈液忽枉巖中翰吟臥復朝夕何當遂遠遊物外候逋客

遊巖京兆人隱箕山高宗幸嵩山遣薛元超就問其母帝親至其門帝曰先生比佳否答曰臣所謂泉石膏肓煙霞痼疾者敕赴都拜崇文館學士進太子洗馬裴炎死坐素厚善放還山

唐詩紀事卷第八

陳子昂 邵大震 李日知 李景伯 劉禕之

王無競 袁恕己 郭元震 崔融 張昌齡

陳子昂

字伯玉梓州人資褊躁然好施予篤朋友與陸餘慶王無競房融崔泰之  
盧藏用趙元最厚唐興文章承徐庾餘風子昂始變雅正為感遇詩三十  
八篇王適曰是必為海內文宗

子昂趙貞固盧藏用杜審言宋之間畢隆澤郭襲微司馬承禎釋懷一陸  
餘慶號方外十友

盧黃門藏用曰道喪五百歲而得陳君 顏真卿曰若激昂頽俗雖無害於  
過正權其中論不亦傷於厚誣與

沈隱侯論謝康樂靈均  
以來此祕未親同也 開寶中梓州刺史郭廷謂以詩哭之略曰魄逐東

流水墳依獨坐山

退之薦士詩曰國朝盛文章子昂始高蹈黃門侍郎盧藏用祭文曰天之

生也珠圓流兮玉方潔子之歿也太山頽兮良玉折士林闕寂兮人物踈  
門館蕭條兮賓侶絕歎佳城之不返辭玉階而長別嗚呼置酒祭子子不  
顧亢聲哭子子不迴唯天道而無託但撫心而已摧

獨異記載子昂初入京不爲人知有賣胡琴者價百萬豪貴傳視無辯者  
子昂突出謂左右曰輦千緡市之衆驚問答曰余善此樂皆曰可得聞乎  
曰明日可集宣揚里如期偕往則酒肴畢具置胡琴於前食畢捧琴語曰  
蜀人陳子昂有文百軸馳走京穀碌碌塵土不爲人知此樂賤工之役豈  
宜留心舉而碎之以其文軸遍贈會者一日之內聲華溢郡時武攸宜爲  
建安王辟爲書記

感遇詩云微月生西海幽陽始代昇圓光正東滿陰魄已朝凝太極生天  
地三元更廢興至精諒斯在三五誰能徵 其一

蘭若生春夏芊蔚何青青幽獨空林色朱蕤冒紫莖遲遲白日晚嫋嫋秋  
風生歲華盡搖落芳意竟何成 其二

蒼蒼丁零塞今古緬荒途  
亭候何摧兀暴骨無全軀  
黃沙暮南起白日隱西隅  
漢甲三十萬曾以事匈奴  
但見沙場死誰憐塞上孤

其三

樂羊爲魏將食子殉軍功  
骨肉且相薄他人安得忠  
吾聞山中相乃屬放麋翁  
孤獸猶不忍況以奉君終

其四

市人矜巧智於道若童蒙  
傾奪相夸侈不知身所終  
曷見玄真子觀世玉壺中  
杳然遺天地乘化入無窮

其五

吾觀龍變化乃知至陽精  
石林何冥密幽洞無留行  
古之得仙道信與元化并  
玄感非象識誰能測淪冥  
世人拘目見酣酒笑丹經  
崑崙有瑤樹安得采其英

其六

白日每不歸青陽時暮矣  
茫茫吾何思林臥觀無始  
衆芳委時晦鷓鴣悲鳴耳  
鴻荒古已頽誰識巢居子

其七

吾觀崑崙化日月淪洞冥  
精魄相交會天壤以羅生  
仲尼推太極老聃貴窈冥  
西方金仙子崇議乃無明  
空色皆寂滅業緣定何成名  
教信紛籍死

生俱未停 其八

聖人祕元命懼世亂其真如何嵩公輩談譎誤時人先天誠爲美階亂禍  
誰因長城備胡寇羸禍發其親赤精旣迷漢子年何救秦去去桃李花多  
言死如麻 其九

深居觀羣動悻然爭朶頤羣動相啖食利害紛疑疑便便夸毗子榮耀更  
相持務光讓天下商賈競刀錐已矣行采芝萬世同一時 其十

吾愛鬼谷子青谿無垢氛囊括經世道遺身在白雲七雄方龍鬪天下亂  
無君浮榮不足貴導養晦時文舒可彌宇宙卷之不盈分豈徒山木壽空  
與麋鹿羣 其十一

呦呦南山鹿離罟以媒和招搖青桂樹幽蠹亦成科世情甘近習榮耀紛  
如何怨憎未相復親愛生禍羅瑤臺傾巧笑玉杯殞雙娥誰見枯城蘖青  
青成斧柯 其十二

林居病時久水木澹孤清閑臥觀物化悠悠念無生青春始萌達朱玉已

滿盈殂落方自此感歎何時平 其十三

臨岐泣世道天命良悠悠昔日殷王子玉馬遂朝周寶鼎淪伊穀瑤臺成  
古丘西山傷遺老東陵有故侯 其十四

貴人難得意賞愛在須臾莫以心如玉探他明月珠昔稱天桃子今爲春  
市徒鴟鴞悲東國麋鹿泣沾蘇誰見鴟夷子扁舟去五湖 其十五

聖人去已久公道緬良難蚩蚩夸毗子堯禹以爲謾驕榮貴工巧勢利迭  
相干燕王尊樂毅分國願同歡魯連讓齊爵遺組去邯鄲伊人信往矣感  
激爲誰歎 其十六

幽居觀大運悠悠念羣生終古代興沒豪聖莫能爭三季淪周赧七雄滅  
秦嬴復聞赤精子提劍入咸京炎光旣無象晉虜紛縱橫堯禹道已昧昏  
虐勢方行豈無當世雄天道與胡兵咄咄安可言時醉而未醒仲尼溺東  
夏伯陽遁西溟大運自古來旅人胡歎哉 其十七

逶迤世已久骨鯁道斯窮豈無感激者時俗頽此風灌園何其鄙皎皎於



陵子世道不相容嗟嗟張長公 其十八

聖人不利己憂濟在元元黃屋非堯意瑤臺安可論吾聞西方化清淨道  
彌敦奈何窮金玉彫刻以爲尊雲架山林盡瑤圖珠翠煩鬼功尙未可人  
力安能存夸愚適增累矜智道逾昏 其十九

玄天幽且默羣議曷嗤嗤聖人教猶在世運久陵遲一繩將何繫憂醉不  
能持去去行采芝勿爲塵所欺 其二十

蜻蛉遊天下與世本無患飛飛未能止黃雀來相干穰侯富秦寵金石比  
交歡出入咸陽裏諸侯莫敢言寧知山東客激怒秦王肝布衣取丞相千  
載爲辛酸 其二十一

微霜知歲晏斧柯始青青況乃金天久浩露羣英登山望宇宙白日已  
西溟雲海方蕩涵孤鱗安得寧 其二十二

翡翠巢南海雄雌珠樹林何知美人意驕愛比黃金殺身炎洲裏委羽玉  
堂陰旖旎光首飾葳蕤爛錦衾豈不在遐遠虞羅忽見尋多材信爲累歎

息比珍禽

其二十三

挈餅者誰子  
姣服當青春  
三五明月滿  
盈華不自珍  
高坐委金玉  
微纓懸千鈞  
如何負公鼎  
被敝笑時人

其二十四

寒蟬號白露  
茲歲已蹉跎  
羣物從大化  
孤英將奈何  
瑤臺有青鳥  
遠食玉山禾  
崑崙見玄鳳  
豈復羅雲龍

其二十五

荒哉穆天子  
始與白雲期  
宮女多怨曠  
層城閉峨眉  
日晚瑤臺樂  
豈傷桃李時  
青苔空萎絕  
白髮生羅帷

其二十六

朝發宜都渚  
浩然思故鄉  
故鄉不可見  
但見巫山陽  
巫山彩雲沒  
高丘正微茫  
佇立望已久  
涕淚霑衣裳  
豈茲越鄉感  
憶昔楚襄王  
朝雲無處所  
荆國亦淪亡

其二十七

昔日章華宴  
荆王樂荒淫  
霓旌翠羽蓋  
射兕雲夢林  
竭來高堂觀  
悵望陽雲岑  
雄圖今何在  
黃雀空哀吟

其二十八

丁亥歲云暮  
西山事甲兵  
羸糧市邛道  
荷戟爭羌城  
嚴冬陰風勁  
窮岫油

雲生昏黷無晝夜羽檄復相驚拳跼兢萬仞崩危走九冥籍籍峰壑裏哀  
哀冰雪行聖人御宇宙聞道太階平肉食謀何失藜藿緬縱橫

其二十九

可惜瑤臺樹灼灼佳人姿碧華映朱實攀折青春時豈不盛光寵榮君白  
玉墀但恨紅芳歇凋傷感所思

其三十

竭來豪遊子勢利禍之門如何蘭膏歎感激自生怨衆趨明所避時棄道  
猶存雲泉旣已失羅網與誰論箕山有高節湘水有清源唯應白鷗鳥可  
爲洗心言

其三十一

索居猶幾日炎夏忽然衰陽彩皆陰翳親支盡暎違登山望不見涕泣久  
漣洏宿昔感顏色若與白雲期世中驕豪子驅逐正嗙嗙蜀山與楚水攜  
手在何時

其三十二

金鼎合神丹世人將見欺飛飛騎羊子胡乃在峨眉變化固幽類芳菲能  
幾時疲痾苦淪世憂海日侵播眷然顧幽褐白雪空涕洟

其三十三

朔風吹海樹蕭條邊已秋亭上誰家子哀哀明月樓自言陰燕客結髮事

遠遊赤丸殺公吏白刃報私讎避仇至海上被役此邊州故鄉三千里遼  
水復悠悠每憤胡兵入常爲漢國羞何知七十載白首未封侯 其三十四  
本爲貴公子平生實憂才感時思報國拔劍起蒿萊西馳丁令塞北上單  
于臺登山見千里懷古心悠哉誰言未忘禍磨沒成塵埃 其三十五  
浩然坐何慕吾蜀有峨眉念與楚狂子悠悠白雲期時哉悲不會涕泣久  
漣洏夢登西山冗南采巫江芝探元觀造化遺出從雲嶠婉戀將永矣感  
悟不見之 其三十六

朝入雲中郡北望單于臺胡秦何密邇沙朔氣雄哉藉藉天驕子猖狂已  
復來塞垣無名將亭堠空崔嵬咄嗟吾何歎邊人塗草萊 其三十七  
仲尼探元化幽鴻順陽和大運自盈縮春秋遞來過首飈忽號怒萬物相  
紛劇溟海皆震蕩孤鳳其如何 其三十八

### 邵大震

九日登玄武山旅眺云九月九日望遙空秋水秋天生夕風寒鴈一向南

飛遠遊人幾度菊花叢

盧照隣和云九月九日眺山川歸心歸望積風煙他鄉共酌金花酒萬里同悲鴻鴈天

玄武山在今東蜀高宗時王勃以檄鷄文斥出沛王府既廢客劍南有遊玄武山賦詩照隣爲新都尉大震其同時人也

勃詩云九月九日望鄉臺他席他鄉送客杯人今已厭南中苦鴻鴈那從北地來

李日知

鄭州人景龍初爲相初安樂公主館第成中宗臨幸燕從官賦詩日知卒章曰所願但知居者樂無使時稱作者勞獨以規誠睿宗他日謂曰嚮時雖朕亦不敢諫非卿亮直何能爾卽拜侍郎

亮直唐書本傳作挺直

李景伯

中宗宰相懷遠之子景龍初爲諫議大夫中宗宴侍臣酒酣各命爲迴波

辭景伯獨爲箴規語帝不悅蕭至忠曰真諫官也

迴波辭曰迴波爾持酒卮微臣職在箴規侍宴既過三爵喧譁切恐非宜  
劉禕之

字希美常州人與孟利貞高智周郭正一俱有名號劉孟高郭上元中與  
元萬頃等偕召入禁中論次新書高宗又密與參決時政以分宰相權時  
謂北門學士武后時以罪賜死

九成宮秋初應制詩云玄圃疏金闕仙臺駐玉鑾野分仙鷲岫路接寶鷄  
壇林樹千霜積山宮四序寒蟬急知秋早鶯踈覺夏闌怡神紫氣外凝涕  
白雲端舜海詞波發空驚游聖難

和太子納妃公主出降詩曰夢梓青光陞穠桃藹紫宮德優宸念遠禮備  
國姻崇萬戶聲明發三條騎吹通香輪送重景綵旆引仙虹

奉和別越王詩云周屏辭金殿梁驂整玉珂管聲依折柳琴韻動流波鶴  
蓋分陰促龍軒別念多延襟小山路還起大風歌

王無競

字仲列宋太尉弘之裔氣豪縱下筆成章爲殿中侍御史張易之等誅坐嘗交貶廣州仇家矯榜殺之

巫山詩云神女向高唐巫山下夕陽徘徊作行雨婉變逐荆王電影江前落雷聲峽外長霽雲無處所臺館曉蒼蒼

宋之問下山歌云懷嵩丘兮所思攜佳人兮步遲松間明月長如此君再遊兮復何時

無競和云日云暮兮嵩山路連綿兮樹石間谷口兮見明月心徘徊兮不能還

袁恕己

詠屏風云綺閣雲霞滿芳林草樹新鳥驚疑欲曙花笑不關春山對彈琴客溪流垂釣人請看車馬客行處有風塵

恕己滄州人與誅二張相中宗及貶周利正逼殺之

郭元震

古劍歌云君不見昆吾鐵冶飛炎煙紅光紫氣俱赫然良工鍛鍊凡幾年  
鑄得寶劍名龍泉龍泉顏色如霜雪良工嗟咨歎奇絕瑠璃玉匣吐蓮花  
錯鏤金環生明月正逢天下無風塵幸得用防君子身精光黯黯青蛇色  
文章片片綠龜鱗非直結交遊俠子亦曾親近英雄人何言中路遭棄捐  
零落飄淪古獄邊雖復沉埋無所用猶能夜夜氣衝天

顧步涕橫落高詠寶劍篇神交付溟漠

子美過代公故宅詩云壯公臨事斷

元震尉通泉任挾使氣撥去小節武后知所為召欲詰既與語奇之索所  
為文章上寶劍篇后覽嘉歎詔示學士李嶠等

久戍人偏老長征馬少肥元震警句也元振嘗山居夜有人面如盤出燈  
下元震以此詩題其頰遂滅明日出行巨木上有白耳此句在焉

元震魏州人年十六與薛稷趙彥昭同為大學生資雄邁景雲中位宰相

崔融



融字成安齊州人擢八科高第與李嶠蘇味道王紹宗附易之兄弟杜審言爲融所獎引爲服總麻子禹錫翹知名孫巨曾孫從

和宋之問寒食題黃梅江驛云春分自淮北寒食渡江南忽見潯陽水疑是宋家潭明主闔難叫孤臣逐未堪遙思故園陌桃李正酣酣

宋之問詩云馬上逢寒食愁中屬暮春可憐江浦望不見洛橋人北極懷明主南溟作逐臣故園腸斷處日夜柳條新

戶部尙書崔公挽歌云八座圖書委三臺章奏盈舉杯常有勸曳履忽無聲市若荊州罷池如薛縣平空餘濟南劍天子署高名

詠劍詩云寶劍出昆吾龜龍夾采珠五精初獻術千戶競論都匣氣衝牛

斗山形轉鹿廬欲知天下貴持此問風湖

風湖字未詳

則天皇后挽歌云前殿臨朝罷長陵合葬歸山川不可望文物盡成非陰月霾中道軒星落太微空餘天子孝松上景雲飛

韋長史挽詞云日落桑榆下寒生松柏中冥冥多若霧切切有悲風京兆

新阡闢扶陽甲第空郭門從此送荆棘漸蒙籠

崔融瓦松賦序曰崇文館瓦松者產于屋霑之下謂之木也訪山客而未詳謂之草也驗神農而罕記賦云煌煌特秀狀金芝之產霑歷歷虛懸若星榆之種天葩條郁毓根抵連卷間紫苔而蔓露凌碧瓦而含煙又曰慙魏宮之烏悲惡漢殿之紅蓮崔公博學莫不該悉豈不知瓦松已有舊說乎博雅云在屋曰昔邪在墻曰垣衣廣志謂之香生於久屋之瓦魏明帝好之命長安西載其瓦於洛陽以覆屋前代詞人詩中多用昔邪梁簡文詠薔薇曰緣堦覆碧倚依簷映昔邪或言屋上木多松栽土木氣洩則瓦

松生出酉陽雜俎

烏悲字未詳

久視元年改控鸛府爲奉宸府張易之爲奉宸令引詞人爲供奉佞者奏云昌宗王子晉後身令被羽衣吹簫乘木鸛奏樂於庭融賦詩爲絕唱有昔遇浮丘伯今同丁令威中郎才貌是藏史姓名非之句後與宰相蘇味道相諂云某詩所以不及相公無銀花合也蘇有詩云火樹銀花合味道

云子詩雖無銀花合還有金銅丁取令威之句也

融爲文華婉當時未有輩者朝廷大筆多手敕委之譔武后哀冊最高麗絕筆而死時謂思苦神竭云

### 張昌齡

冀州人與兄昌宗皆能文昌齡舉進士與王公治齊名皆爲考功王師且所紕太宗問之答曰昌齡等華而少實其文浮靡非令器也取之則後生勸慕亂陛下風雅帝然之後獻翠微宮頌敕於通事舍人裏供奉賀蘭敏之奏豫北門修撰卒南部新書云昌齡與文皇作息兵詔歎曰彌衡潘岳之儔也

唐詩紀事卷第九

李適

張錫

徐彥伯

宗楚客

韋承慶

蕭至忠

李迥秀

劉憲

崔湜

岑羲

李適

適字子至京兆人武后修三教珠英以李嶠張昌宗爲使取文學士綴集  
適與王無競尹元凱等在選睿宗時以工部侍郎卒

九日登慈恩應制云鳳輦乘朝霽鸚鵡林對晚秋天文貝葉寫聖澤菊花浮  
塔似神功造龕疑佛影畱幸陪清漢蹕欣奉淨居遊

答宋十一崖口五渡見贈云聞君訪遠山躋險造幽絕眇然青雲境觀奇  
彌年月登嶺亦泝溪孤舟事泐越嶠嶂傳彩翠崖磴互欹缺石林上攢叢  
金澗下明滅捫壁窺丹井梯苔瞰乳穴忽枉巖中贈對翫未嘗輟殷勤獨  
往事委曲鍊藥說邀余名山期從爾泛海滋歲晏秉宿心斯言匪徒說

初中宗景龍二年始於修文館置大學士四員學士八員直學士十二員

象四時八節十二月於是李嶠宗楚客趙彥昭韋嗣立爲大學士適劉憲  
崔湜鄭愔盧藏用李乂岑羲劉子玄爲學士薛稷馬懷素宋之間武平一  
杜審言沈佺期閻朝隱爲直學士又召徐堅韋元旦徐彥伯劉允濟等滿  
員其後被選者不一凡天子饗會游豫唯宰相直學士得從春幸黎園並  
渭水祓除則賜柳圈辟癘夏宴蒲萄園賜朱櫻秋登慈恩浮圖獻菊花酒  
稱壽冬幸新豐歷白鹿觀上驪山賜浴湯池給香粉蘭澤從行給翔麟馬  
品官黃衣各一帝有所感卽賦詩學士皆屬和當時人所欽慕然皆狎猥  
佻佞忘君臣禮法惟以文華取幸若韋元旦劉允濟沈佺期宋之間閻朝  
隱等無宅稱景龍二年七夕御兩儀殿賦詩李嶠獻詩云唯言七襄詠流  
入五絃歌是日李行言唱步虛歌九月幸慈寺塔上官氏獻詩羣臣並賦閏九月幸  
總持登浮圖李嶠等獻詩十月三日幸三會寺十一月十五日中宗誕辰  
內殿連句爲栢梁體二十一日安樂公主出降武延秀是月以婕妤上官  
爲昭容十二月六日上幸薦福寺鄭愔詩先成舊邸三乘關是也宋之間後進鵲象

法王歸是也

立春侍宴賦詩二十一日幸臨渭亭李嶠等應制三十日幸長安

故城十二月晦諸學士入閣守歲以皇后乳母戲適御史大夫竇從一往

來其家遂有國爹之號三年七日清暉閣登高遇雪宗楚客詩云蓬萊雪

作山是也因賜金綵人勝李嶠等七言詩

千鍾聖酒御筵披是也

是日甚懽上令學

士遞起屢舞至沈佺期賦迴波有齒綠牙緋之語晦日幸昆明池宋之問

詩自有夜珠來之句至今傳之二月八日送沙門元奘等歸荊州李嶠等

賦詩十一日幸太平公主南莊七月幸望春宮送朔方節度使張奩赴軍

八月三日幸安樂公主西莊九月九日幸臨渭亭分韻賦詩

韋安石先成

十一

月一日安樂公主入新宅賦詩十五日中宗誕辰長寧公主滿月李嶠詩

龍神見像日仙鳳養雛年是也二十三日南郊徐彥伯上南郊賦十二月

十二日幸溫泉宮勅蒲州刺史徐彥伯入仗同學士例因與武平一等五

人獻詩上官昭容獻七言絕句三首十四日幸韋嗣立莊拜嗣立逍遙公

名其居曰清虛原幽栖谷十五日幸白鹿觀十八日幸秦始皇陵四年正

月朔賜羣臣栢樹五日蓬萊宮宴吐蕃使因爲栢梁體

吐蕃舍人亦賦

七日重宴

大明殿賜綵鏤人勝又觀打毬八日立春賜綵花二十九日晦幸澹水二月一日送金城公主三日幸司農少卿王光輔莊是夕岑羲設茗飲討論經史武平一論春秋崔日用請北面日用贈平一歌曰彼名流兮左氏癖意玄遠兮冠今昔二十一日張亶至自朔方宴于桃花園賦七言詩明日宴承慶殿李嶠桃花園詞因號桃花行三月一日清明幸黎園命侍臣爲拔河之戲三日上巳祓禊於渭濱賦七言詩賜細柳圈八日令學士尋勝同宴於禮部尙書竇希琳亭賦詩張說爲之序十一日宴於昭容之別院二十七日李嶠入都祔廟徐彥伯等餞之賦詩四月一日幸長寧公主莊六日幸興慶池觀競渡之戲其日過希玠宅學士賦詩二十九日御宴祝欽明爲八風舞諸學士曰祝公斯舉五經掃地盡矣睿宗時道士司馬承禎還天台適贈詩詞甚美朝士屬和三百餘人徐彥伯編爲白雲記

中宗幸興慶戲競渡應制云拂霧金輿丹旆轉凌晨黼帳碧池開南山倒

影從雲落北澗搖光寫浪迴急舸爭標排荇度輕帆截浦觸荷來橫汾宴  
鎬歡無極歌舞年年聖壽盃

陪幸臨渭亭詩云長樂喜春歸披香愛雪霏花從銀閣度絮繞玉窗飛寫  
曜銜天藻呈祥拂御衣上林紛可望無處不光輝

安樂公主山莊云平陽金榜鳳凰樓沁水銀河鸚鵡洲綵仗遙尋丹壑裏  
仙輿暫幸綠亭幽前池錦萬蓮花艷後嶺香爐桂藥秋貴主稱觴萬年壽  
還輕漢武濟汾遊

人日大明宮應制云朱城待鳳韶華至碧殿乘龍淑氣來寶帳金屏人已  
帖圖花學鳥勝初栽林香近接宜春苑山翠遙添獻壽杯向夕憑高風日  
麗天文垂曜象昭回

望春宮迎春應制云玉輦金輿天上來花園四望錦屏開輕絲半拂朱城  
柳細纈全披畫閣梅舞蝶分行飄御席歌鸞度曲繞仙盃聖詞春日光輝  
滿漢主秋風莫道才



送金城公主云降河從遠娉青海赴和親月作臨邊曉花爲度隴春主歌  
悲顧鸛帝策重安人獨有瓊簫去悠悠思錦輪

宴安樂公主新宅云銀河半倚鳳凰臺玉酒相傳鸚鵡杯若見君平須借

問仙槎一去幾時來

餞唐永昌赴任東都云聞道飛鳧向洛陽翩翩矯翮度文昌自尙書郎爲令因聲

寄意三花樹少室崑前幾過香適云有田在少室不見十年矣

徐元伯題適碑陰序曰謔請李公生自號東山子死葬東山豈其識哉神

交者歌薤露以送子歸東山焉歌曰隴障縈紫氣金光赫氛氲美人含遙

靄桃李方自薰圖高黃鸞羽寶奪驪龍羣忽驚薤上曲掩噎東山雲回也

實天枉賈生亦晚促今復哀若人危迅風前燭夜臺淪清鏡窮塵埋結綠

何以贈下泉生芻唯一束

張錫

慈恩寺九月九日登浮圖應制云九州霜景淨千門曉望通仙遊光御路

瑞塔迥凌空菊彩揚堯日萸香遶舜風天文麗辰象竊抃仰層穹

晦日宴高文學林亭云雪盡銅駝路花照石崇家年光開柳色池影汎雲華賞洽情方遠春歸景未賒欲知多暇日罇酒漬澄霞

錫文琮之子也久視初代其甥李嶠爲宰相請還廬陵王不爲張易之所右俄知選坐賊論流循州韋后臨朝爲相旬日出刺絳州卒

徐彥伯

兖州人爲蒲州司軍兵參時司戶韋高善判司士李亘工書彥伯屬辭號河東三絕武后撰三教珠英取文辭士皆天下選彥伯嶠居首

和宋之間崖口五渡云聞有獨往客拂衣捐世心結忻薄枉渚撰念榮舊林經亘去崖合冥綿歸壑深琪樹環碧彩金潭生翠陰洄泓弄沙傍危眺明岑夕聞桂裏猿曉翫松上禽雜珮蘊孤袖瓊敷綴雙衿我懷滄洲想懿爾白雪吟秉願理方叶存期跡易尋茲言庶不負爲報巖中琴

贈劉舍人古意云深林闕靈鳥文章世所希巢居碧梧樹舞君青瑣闥或

言鳳池樂撫翼更西飛鳳池環禁林仙閣霧沉沉  
璇題激流日珠綴綿清陰郁穆絲言重熒煌台座深  
風張丹朶翮月弄紫庭音還彩結不散孤英  
跂莫尋浩歌向蘭渚婉戀故儔心

和韋元旦早朝云夕轉清壺漏晨驚長樂鐘  
逶迤綸禁客假寐守銅龍予亦趨三殿肩隨謁  
九重繁珂接曙響華劍比春容相間苔光歇  
彌憐芳意濃願言乘日旰携手卽雲峰

祓禊渭濱侍宴應制云晴風麗日滿芳洲御幕  
春筵祓錦流皆言曲侍璜溪宴豔似輕飛天漢遊

侍宴韋嗣立莊云鼎臣休澣隙方外結遙心別業  
青霞境孤潭碧樹林每馳東野策遙弄北溪琴  
帝眷紆時豫台園賞歲陰移鑾明月沼張組白  
雪岑御酒瑤觴落仙壇竹徑深三光懸聖藻五等  
冠朝簪自昔皇恩感咸言獨自今

送金城公主云鳳辰憐簫曲鸞闈念掌珍羗庭遙  
築館廟策重和親星轉

銀河夕花移玉樹春聖心悽遠送留蹕望征塵

駕幸溫泉云姬典歌時邁虞編記省方何如黑帝月玄 白雲鄉翠仗縈

舩岸明旂應蕢

音負王草也

陽風搖花蕢彩雪艷寶戈芒御陌開山次離宮夾

樹行桂枝籠騷鬢松葉蔭堂皇仙女舍珠液溫池孕璧房湧疑神漢溢泛  
若帝臺漿獨沸流常熱潛蒸氛轉香青玳環玉螿紅淀鑠金光藻曜凝芳  
潔葳蕤獻淑祥五龍歸寶算九雁叶時康同預華封老中衢祝聖皇

安樂公主新宅云鳳樓開闔引明光花耐連添醉益香欲知帝女薰天貴

金歌玉柱夜成行

或云云金珂玉柱  
或云金歌玉柱

餞唐永昌云金谿碧水玉潭砂鳧鳥翩翩弄日華鬪鷄香陌行春倦爲摘  
東園桃李花

餞唐州高使君云香萼媚紅滋垂條縈綠絲情人拂瑤袂共惜此芳時驢  
駃已躑躅鳥隼方葳蕤跂聞望太守流潤及京師

中宗幸輿慶池戲競渡獻詩曰夾道傳呼翊翠虬天廻日轉御芳洲青潭

曉靄籠仙蹕紅嶼晴花隔綵旒香溢金環盈廣坐聲搖妓舸匣中流羣臣相慶嘉魚樂共哂橫汾歌吹秋

中宗與修文館學士宴樂賦詩每命彥伯爲之序文彩華縟夜宴安樂公主新第序云言容有典緝似幄之柔規湯沐增榮結風庭之藻渙又曰鳴璜節珮登繡軸之瑀軒花綬香纓帶澤壺之青鑱此言送鄭惟忠序云卷蘆葉而橫吹聲愁隴月撫劍鏌而直視目斷洲

彥伯爲文多變易求新以鳳閣爲鸚閣龍門爲虬戶金谷爲銑溪玉山爲瓊岳竹馬爲篠驂月兔爲魄兔進士効之謂之徐澁體

### 宗楚客

正月晦中宗幸漉水詩云御輦出明光乘流泛羽觴珠胎隨月減玉漏與年長寒盡梅猶白風遲柳未黃日斜旌騎轉休氣滿林塘

人日清暉閣應制云窈窕神仙閣參差雲漢間九重中禁啓七夕早春還太液天爲水蓬萊雪作山今朝上林樹無處不堪攀

幸安樂公主西園應制詩玉樓銀榜枕嚴城翠蓋虹旗列禁庭日映層巖  
圖畫色風搖雜樹管絃聲水邊重閣含飛動雲裏孤峰似削成幸陪七聖  
遊崐閩無勞萬里訪蓬瀛

又安樂公主入新宅詩云星橋他日創仙榜此時開馬向鋪錢埒簫聞弄  
玉臺人疑衛叔美客似長卿才借問遊天漢誰能取石廻

楚客字叔敖河東人節愍太子之敗也楚客請殊其首祭三思俄爲相與  
紀處納締交世號宗紀御史崔琬劾之帝詔琬與宗紀兄弟兩解之世謂  
帝爲和事天子韋氏敗被誅

### 韋承慶

字延休性謹畏長安中爲相附張易之時與異母弟嗣立並爲宰相韋氏  
孝友詞學則承慶嗣立邃音樂有萬石達禮儀則叔夏史才博識有述時  
趙冬曦兄弟亦各有名張說曰韋趙兄弟人之杞梓

寒食應制詩云鳳條春色晚龍禁早輝通舊火收槐燧餘寒入桂宮鶯啼

正隱葉鷄鬪始開籠藹藹瑤山滿仙歌始樂風

直中書省詩清切鳳凰池扶踈鷄樹枝惟應集鸞鷲何爲宿羈雌大造乾坤闢深恩雨露垂昆蚊旣含養鴛駘亦驅馳木偶翻爲用芝泥忽濫窺九思空自勉五字本無施徒喜逢千載何階答二儀螢光向日盡蚊力負山疲禁宇庭除闊閑宵鐘箭移暗花臨戶發殘月下簾欹白髮隨身改丹心爲主披命將時並泰言與行俱危寄謝巢由客堯年正在斯

南中詠雁云萬里人南去三秋雁北飛不知何歲月得與爾同歸

凌朝浮江旅思云天晴上初日春水送孤舟山遠疑無樹潮平似不流岸花榮且落江鳥沒還浮羈望傷千里長歌遣客愁

蕭至忠

安樂公主山莊云西郊窈窕鳳凰臺北渚平明法駕來匝地金聲初度曲周堂玉溜始傳杯灣路分遊畫舟轉巖門相向碧亭開微臣此時承宴樂髣髴疑從星漢廻

九日侍宴應制云望幸三秋暮登高九日初朱旗巡漢苑翠帟俯秦墟寵  
極萸香遍恩深菊耐餘承權何以答萬億俯宸居

得餘字

慈恩寺九日登塔應制云天蹕三乘啟星輿六轡行登高臨寶塔極目遍  
王城神衛虛中遶仙歌雲外清重陽千萬壽率舞頌昇平

至忠德言孫相中宗後從太平公主逆謀誅明皇曰至忠誠國器但晚謬  
耳

### 李迥秀

慈恩寺九日應制云沙界人王塔金繩梵帝遊言從祇樹賞行翫菊叢秋  
御酒調甘露天花亂綵旒堯年持佛日同此慶時休

和主弟錫宴云金榜峇嶷雲裏開玉簫參差天際迴莫驚側弁還歸路祇  
爲平陽歌舞催

安樂公主山莊云詰旦重門聞警蹕傳言太主奏山林是日迴輿羅萬騎  
此時歡甚賜千金鷺羽鳳簫參樂曲荻蘆竹徑接帷陰手舞足蹈方無已



萬年千歲奉薰琴

迥秀崔湜鄭愔在武后中宗時以姦淫汙名位然皆有文迥秀嘗以鴛鴦一雙與張易之共飲取其常相逐也

迥秀爲兵部尙書有疾謂問者曰僕自知當作侍中有命固不憂也問者出門而終詔贈侍中

劉憲

送張亶赴朔方應制云命將擇耆年圖功勝必全光輝萬乘餞威武二庭宣中衢橫鼓角曠野蔽旌旃推食天厨至投醪御酒傳涼風過雁苑殺氣下鷄田分闡恩何極臨歧動睿篇

陪幸長寧公主林亭莊云公主林亭地清晨降玉輿畫橋飛渡水仙閣涌臨虛晴新看蛺蝶夏早摘芙蓉文酒娛遊盛忻叨侍從餘

陪幸五王宅云北斗樞機任西京肺腑親疇昔王門下今茲制幸晨恩光山水被聖作管絃新遶座薰紅藥當軒暗綠筠摘荷纔早夏聽鳥尙餘春

行漏金徒晚風煙起觀津

三會寺應制云岵嶢蒼史臺敞朗紺園開戒旦壺人警飜霜羽騎來下輦  
登三襲褰旒望九垓林披館陶滂水浸昆明灰網戶飛花綴幡竿度鳥廻  
豫遊仙唱動蕭洒出塵埃

薦福寺應制云地靈傳景福天駕儼鈎陳佳哉藩邸舊赫矣梵宮新香塔  
魚山下禪堂雁水濱珠幡映白日鏡殿寫青春甚懽延故吏大覺拯生人  
幸承歌頌末長奉屬車塵

陪遊上苑遇雪云龍驂曉日望春宮正逢春雪舞春風花光併在天文上  
寒氣行銷御酒中

賜剪綵花應制云上林宮館妓春心獨早知剪花疑始發刻燕似新窺色  
濃輕雪點香淺嫩風吹此日叨陪侍恩榮槩數枝

人日清暉閣應制云輿輦乘人日登臨上鳳京風尋歌曲颺雪向舞行縈  
千官隨興合百福與時并承恩長若此微賤幸昇平

安樂公主山莊云主家別墅帝城隈無勞海上覓蓬萊  
沓嶂懸流平地起危樓曲閣半天開庭莎作薦舞行出  
浦樹相將歌棹迴此日風光與形勝祇言併伴聖詞來

侍宴韋嗣立莊云東山有謝安枉道鳴和鑿緹騎紛初日  
霓旌度曉寒雲蹕巖間下虹橋澗底盤幽棲俄似屆聖  
矚宛餘觀崖懸飛溜直岸轉綠潭寬桂華堯酒洽松響舜  
絃彈明主恩斯極賢臣節更殫不才叨侍從詠聽以濡翰

白鹿觀應制云玄遊乘落暉仙宇曖霏微石梁縈澗轉  
珠旆掃壇飛芝童薦膏液松鸚舞驂駢還似瑤池上歌成  
周馭歸

人日翫雪應制云勝日登臨雲葉起芳風搖蕩雪花飛  
星暉幸得承金鏡颺影還將奉玉衣

送金城公主云外館踰河右行營指路歧和親悲遠嫁  
忍愛泣將離旌旆羌風引軒車漢水隨那堪馬上曲時向  
管中吹

興慶池應制云蒼龍闕下天泉池軒駕來遊簫管吹緣堤夏篠縈不散冒  
水新荷卷復披帳殿疑從畫裏出樓舩直在鏡中移自然東海神仙處何  
用西崑轍迹疲

宴安樂公主新宅云層軒洞戶旦新披度曲飛觴夜不疲綺綴玲瓏河色  
曉珠簾隱映月華窺

餞唐永昌云始見郎官拜洛陽旋聞近侍發雕章緒言已勗期年政綺字  
當生滿路光

七夕應制云秋吹過雙闥星仙動二靈更深移月鏡河淺度雲駟殿上呼  
方朔人間失武丁天文茲夜裏光映紫微庭

慈恩寺九日應制云香塔層霄半仙鑣淨鏡遊登臨憑季月寥廓見中州  
御酒新寒退天文寶氣浮却邪將獻壽茲日奉千秋

人日侍宴大明宮應制云禁苑韶華此日歸東郊道上轉青旂柳色梅芳  
何處所風前雪裏覓芳菲開冰池內魚新躍剪綵花間鷺始飛欲識王游

達陽氣爲觀天藻競春輝

奉和三日祓禊渭濱云桃花欲落柳條長沙頭水上足風光此時御蹕來  
遊處願奉年年祓禊觴

奉和春幸望春宮應制云暮春春色最便妍苑裏花開列御筵商山積翠  
臨城起漉水浮光共幕連鶯藏嫩葉歌相喚蝶礙芳叢舞不前歡娛節物  
今如此願奉宸遊億萬年

憲字元度宋州人爲中書舍人坐善張易之出刺渝州召爲太僕少卿兼  
修文館學士卒天授中治來俊臣獄疾其酷欲痛繩之反爲所陷明皇在  
東宮憲啓曰褚無量經明行脩耆年宿望宜數召問以察其言太子順納

崔湜

白鹿觀應制云御旗探紫籙仙仗闢丹丘捧藥芝童下焚香桂女留鸞歌  
無歲月鶴語記春秋臣朔其何幸常陪漢武遊

送金城公主云懷戎前冊備降女舊姻脩簫鼓辭家怨旌旆出塞愁尙孩

中念切方遠御慈留顧乏謀臣用仍勞聖主憂

餞唐州高使君云芳春桃李時京都物華好爲岳豈不貴所悲陟遠道遠道不可思宿昔夢見之贈君雙佩刀日夕視來期

慈恩寺九日應制云帝里重陽節香園萬乘來却邪萸結珮獻壽菊傳杯塔類承天湧門疑待佛開睿詞懸日月長得仰昭回

立春內出綵花應制云澹蕩春光滿曉空逍遙御輦入離宮山河降望雲天外臺榭參差煙霧中庭際花飛錦繡合枝間鳥囀管絃同卽此歡娛齊鎬宴唯應率舞樂薰風

婕妤怨云不分君恩斷新粧視鏡中容華向春日嬌愛似秋風枕席臨燈曉屏幃向月空年年後庭樹榮落在深宮

秦州薛都督挽詞云十里絳山幽千年汾水流碑傳門客建劍是故人留壠樹煙含夕山門月照秋古來鐘鼎盛共盡一蒿丘

提仁師之子弟澄液從兄泣並有文翰列居清要每私宴自比王謝之家

謂人曰吾門戶及出身歷官未嘗不爲第一丈夫當先據要路以制人豈能默默受制於人故進取不已而不以令終湜執政時年三十六嘗暮出端門下天津馬上賦詩曰春還上林苑花滿洛陽城張說見之歎曰文與位固可致其年不可及也

湜字澄瀾以文詞稱附韋后作相又附太平公主門下客獻海鷗賦以諷湜稱善而不自悛帝誅蕭至忠韋流嶺外後知湜本謀賜死荊州

### 岑羲

安樂公主山莊云銀榜重樓出霧開金輿步輦向天來泉聲迴入吹簫曲山勢遙臨獻壽杯帝女含笑流飛電乾文動色象昭回誠願北極拱堯日微臣抃舞詠康哉

宴安樂公主新宅云金榜重樓開夜扉瓊筵愛客未言歸御歡不覺銀河曙盡醉那知玉露晞

餞唐州高使君云蒼茫南塞地明媚上春時目極傷千里懷居不自持征

車別歧路斜日下崦嵫一歎輶軒阻悠悠卽所思

慈恩寺九日應制云寶臺聳天外玉輦步雲端日麗重陽景風搖季月寒  
梵堂遙集雁帝樂近翔鸞願獻延齡酒長承湛露歡

立春內出綵花應制云和風助律應韶年清蹕乘高入望先花笑鶯歌迎  
帝輦雲披日霽俯皇川南山近獻仙杯上北斗平臨御座前一奉恩榮歡  
在鎬空知率舞聽薰絃

羲字伯華初爲金壇令弟仲翔長洲令仲休漂水令宗楚客語本道巡察  
御史曰毋遺江東三峯後相中宗睿宗坐預太平公主謀誅始岑氏在清  
要者數十人羲曰物極則反一可以懼矣然不能抑退以及禍



唐詩紀事卷第九

唐詩紀事卷第十

趙彥昭

崔日用

李乂

盧藏用

馬懷素

薛稷

劉允濟

李元紘

李嶠

蘇瓌

蘇頌

趙彥昭

上幸薦福寺令賦詩云初地龍飛後金身佛現時千花開國界萬善累重  
基北闕承行幸西園屬住持天衣拂舊石王舍起前祠刹鳳迎瑯輦幡虹  
駐綵旗同霑小雨潤仰詠大風詩

九日臨渭亭云秋豫凝仙覽宸遊轉翠華呼鷹下鳥路戲馬出龍沙紫菊  
宜新壽丹萸辟舊邪須陪長久宴歲歲奉吹花

安樂公主入新宅詩云雲物中京曉天人外館開飛橋像河漢懸榜學蓬  
萊北闕臨仙檻南山送壽杯一窺輪奐畢慙慙棟梁材

人日清暉閣應制云出震乘東陸憑高御北辰祥雲應早歲瑞雪候初旬

庭樹千花發塔藁七葉新幸承今日宴長奉萬年春

侍宴韋嗣立莊云賢族唯題里儒門但署鄉何如表巖洞宸翰發輝光地在茲山曲家憐郃水陽六龍駐旌罕四壯耀旂常北斗臨台坐東山入廟堂天高羽翼近主聖股肱良野池亭氣村花澗谷香縱然懷豹隱空愧躡鷓行

白鹿觀應制云雲驂驅早景星蹕坐中天國誕玄宗聖家尋碧落仙玉杯鸞薦壽寶算鸛知年一覩光華旦忻承道德篇

登驪山寓目應制云皇情遍九垓御輦駐昭回路若隨天轉人疑近日來河看大禹鑿山見巨靈開願扈封鑾駕常持薦壽杯

人日翫雪應制云始見青雲干律呂俄逢瑞雪應陽春今日迴看上林樹梅花柳絮一時新

七夕應制云青女三秋節黃姑七日期星橋度玉珮雲閣掩羅帷河氣通仙掖天文下睿詞今宵望雲漢應得見娥眉

慈恩寺九日應制云

乘秋節登高出梵宮  
皇心滿塵界佛跡現虛空

日月宜長壽人天得大通  
喜聞題寶唱受記莫由同

立春日侍宴別殿內出綵花應制云  
剪綵迎初候攀條寫故真  
花隨紅意發葉就綠情新  
嫩色驚嚙鶯輕香誤採人  
應爲薰風拂能令芳樹春

人日侍宴大明宮應制云  
寶契無爲屬聖人  
璫輿出幸翫芳辰  
平樓半入南山霧  
飛閣旁臨東野春  
夾路穠花千樹發  
垂軒弱柳萬條新  
處處風光今日好  
年年願奉屬車塵

悼右僕射楊再思詩云  
兩揆光天秩三朝奉帝熙  
何言集大鳥忽此喪元龜  
坐歎公槐落行聞宰樹悲  
壑舟今已去寧有濟川期

彥昭字奐然甘州人少豪邁  
風骨秀爽景龍中爲相以權幸進後御史郭震非元震也劾暴舊惡姚崇惡之  
貶江州別駕卒

崔日用

正月七日宴大明殿詩云  
新年宴樂坐東朝  
鐘鼓鏗鏗大樂調  
金屋瑤筐

開寶勝花牋彩筆頌春椒曲江苔色冰前液上苑梅香雪裏嬌宸極此時  
飛聖藻微臣竊抃預聞韶

望春宮迎春應制云東郊草物正薰聲素滙鳧鷖戲綠汀鳳闕斜通長樂  
觀龍旂直逼望春亭光風遙艷蘭英紫淑景依遲柳色青渭浦明晨脩禊  
事羣公傾賀水心銘

送金城公主云聖后經綸遠謀臣計畫多受降追漢策築館許戎和俗化  
烏孫壘春生積石河六龍今出餞雙鶴願爲歌

宴長樂公主新宅云銀燭金屏坐碧堂只言河漢動神光主家盛明歡不  
極才子能歌夜未央

餞唐永昌云洛陽桴鼓今不鳴朝野咸推重太平冬至冰霜俱怨別春來  
花鳥若爲情

慈恩寺九日應制云紫宸歡每洽紺殿法初隆菊泛延齡酒蘭吹解慍風  
咸英調正樂香梵遍秋空臨幸符天瑞重陽日再中

日用爲御史中丞賜紫是時佩魚須有特恩亦因宴命羣臣撰詞日用曰  
臺中鼠子直須諳信足跳梁上壁龕倚翻燈脂污張五還來嚙帶報韓三  
莫浪語直王相大家必若賜金龜賣却苗兒相報賞中宗亦以金魚賜之  
立春遊苑應制云乘時迎氣正璿衡灞滙煙氛向曉清剪綺裁紅妙春色  
宮梅殿柳識天情瑤筐綵鷺先呈瑞金縷晨鷄未學鳴聖澤陽和宜宴樂  
年年捧日向東城

上宴日日用起舞自歌云東館揔是鵷鸞南臺自多杞梓日用讀書萬卷  
何忍不蒙學士墨制簾下出來微臣眼看喜死其日以日用兼修文館學  
士制日日用書窮萬卷學富三冬日用舞蹈拜謝日用滑州人中宗時武  
三思宗楚客權寵交煽日用多所結納才辯絕人能乘機反禍取富貴韋  
氏平遂爲相嘗謂人曰吾平生所事皆適時制變不專始謀然每一反思  
若芒刺在背云明皇時日用猶被寵眷帝賦詩宴遊多預酬唱送張說巡  
邊應制云吉日四黃馬宣王六月兵擬清鷄鹿塞先指朔方城日用有才

辯惟是姦佞耳中宗時七日應制云曲江苔色冰前液上苑梅香雪裏嬌  
亦佳語也

李义

陪幸臨渭亭詩云青陽御紫微白雪下彤闈  
浹壤流天霈綿區灑帝輝  
水如銀度燭雲似玉披衣爲得因風起還來就日飛

送沙門元奘等還荊州云初日承歸旨秋風起贈言漢珠留道味江壁返  
真源地出南關遠天廻北斗尊寧知一柱觀却啓四禪門

芙蓉園應制云水殿臨丹籞山樓遶翠微昔遊人託乘今幸帝垂衣  
澗篠緣峰合巖花逗浦飛朝廻曲池地無處不光輝

陪幸韋嗣立莊云樞掖調梅暇林園種槿初入朝榮劍履退食偶琴書  
地隱東巖室天廻北斗車旌門臨窳窳輦道屬扶踈雲罕明丹谷霜筩徹紫  
虛水疑投石處溪似釣璜餘帝澤頒卮酒人歡頌里閭一承黃竹咏長奉

白茆居

景龍四年正旦賦栢樹詩云勁節凌冬勁芳心待歲芳能令人益壽非止  
麝含香

陪幸長寧公主莊云紫禁乘宵動青門訪水嬉貴遊鱣序集仙女鳳樓期  
合宴簪紳滿承恩雨露滋北辰還捧日東館幸逢時

陪奉五王宅云家住千門側亭臨二水傍貴遊開北第宸睠幸西鄉曳履  
迎中谷鳴絲出後堂浦疑觀萬象峰似駐三光草向瓊筵樂花承繡辰香  
聖情思舊重留飲賦雕章

三會寺應制云睿德總無邊神臯擇勝緣二儀齊法駕三會禮香筵漢闕  
中黃近秦山太白連臺疑憲鳥日池似刻鯨年滿月臨真鏡秋風入御絃  
小臣叨下列持管謬窺天

薦福寺應制云象設隆新宇龍潛想舊居碧樓披玉額丹枕導金輿代日  
興光近周星掩曜初空歌清沛筑梵樂美何書帝造環三界天文賁六虛  
康哉孝理日崇德在真如



人日清暉閣應制云上日登臺賞中天御輦飛後庭聯舞唱前席仰恩輝  
睿作風雲起農祥雨雪霏幸陪人勝節長願奉垂衣

安樂公主山莊云金輿玉輦背三條水閣山樓望九霄野外初迷七聖道  
河邊忽覩二靈橋懸泉滴滴依虹箭清吹洽洽雜鳳簫向晚平陽歌舞合  
前溪更轉木蘭橈

白鹿觀應制云制蹕乘驪阜迴輿指鳳京南山四皓謁西岳兩重迎雲幄  
臨玄圃霞林薦赤城神明近福地何必往蓬瀛

登驪山寓目應制云崖巘萬尋懸居高敞御筵行戈疑駐日步輦若昇天  
城闕霧中近關河雲外連謬陪登岱駕忻奉濟汾篇

望春宮迎春應制云東城結宇敞千尋北闕迴輿且四臨麗日祥煙承罕  
畢輕萋弱草藉衣簪春商重沓雲巖近河渭縈紆霧壑深謬接鶴鴻陪賞

樂還欣魚鳥遂飛沉

春商恐是  
春字誤

春日遊苑喜雨云仙蹕九成臺香筵萬壽杯一旬初降雨二月早聞雷葉

向朝躋密花含宿潤開幸天承澤遍無使日光催

興慶池應制云神池汎濫水盈科仙蹕紆餘步輦過縱棹洄泓萍溜合門  
軒眺賞麥風和潭魚在藻供遊詠谷鳥含櫻入賦歌寄語乘查溟海客匣  
頭來此問天河

宴安樂公主新宅云牽牛南度象昭回學鳳棲成帝女來平旦鷓鴣歌席  
上方霄鸚鵡獻酬杯

餞唐永昌云田郎才貌出咸京潘子文華向洛城願以深心留善政當令  
強項謝高名

餞唐州高使君云淮源之水清可以濯君纓彼美稱才傑親人行政聲歲  
寒疇曩意春晚別離情終歎臨歧遠行看擁傳榮

餞許州宋司馬云展驥旌時傑談鷄美代賢暫離仙掖務追送近郊筵地  
慘金商節人康壁假田從來昆友事咸以佩刀傳

慈恩寺九日應制云涌塔臨玄地高層瞰紫微鳴鑿陪帝出攀櫟翊天飛

慶洽重陽壽文含列象輝小臣叨載筆欣此頌巍巍

和晦日駕幸昆明池云玉輅尋春賞金堤重晦遊川通黑水浸地派紫泉  
流晃朗扶桑出綿聯樹杞周烏疑埋海處人似隔河秋劫盡灰猶識年移  
石故留汀洲歸棹晚簫鼓雜汾謳

人日侍宴大明宮應制云詰旦行春上苑中憑高御下大明宮千年執象  
寔瀛泰七日爲人慶賞隆鐵鳳曾騫換瑞雪銅烏細轉入祥風此時朝野  
歡無算此歲雲天樂未窮

奉和三日祓禊渭濱云上林花鳥暮春時上巳陪遊樂在茲此日欣逢臨  
渭賞昔年空道濟汾詞

又爲紫微侍郎與蘇頌對掌綸誥明皇曰前有味道嶠朕今有頌又皆號  
蘇李時宰輔子將授太廟頌草詞久不就曰以遵仲尼之間而未能續又  
曰何不云宜採方山之能頌伏其敏

又字尙真趙州人年十二工屬文薛元超曰是子且有海內名沈正方雅

識治體時稱有宰相器初爲黃門侍郎開元初姚崇爲紫微令乃薦爲侍郎外託引重實去其糾駁權畏又明切也未幾卒於刑部尙書兄尙一尙正俱有名同爲一集號李氏花萼集

尙一終清源尉尙正博州刺史

### 盧藏用

幸安樂公主西莊應制云皇女瓊臺天漢潄星橋月宇創山林飛蘿半拂銀題影瀑布環流玉砌陰菊酒香隨鸚鵡泛簫樓韻逐鳳凰吟瑤池蹕駐思方久璧月無文興轉深

餞唐州高使君云餞酒臨豐樹寒帷出魯陽蕙蘭春已曉桐栢路猶長祖逖方城鎮安期外氏鄉從來二千石天子命惟良

餞許州宋司馬云國爲休徵選輿因仲舉題山川襄野隔朋酒灞亭睽零兩征軒鷺秋風別驥嘶驪歌一曲罷愁望正淒淒

慈恩寺九日應制云化塔龍山起中天鳳輦迂綵旒牽畫刹雜珮冒香萸寶葉擎千座金英漬百孟秋雲飄聖藻霄極捧連珠

主弟夜宴云侯家主第一時新上席花年不惜春珠缸綴月那知夜玉罌  
流霞畏底晨

宋主簿鳴皋夢趙六未及報而陳子云亡追爲此詩答宋兼貽平昔遊舊  
云暮川罕停波朝雲無留色故人琴與詩可存不可識識心尙可親琴詩  
非故人鳴皋初夢趙蜀國已悲陳感化傷淪滅魂交昔未申冥期失幽報  
茲理復今晨前嗟成後泣已矣將何及舊感與新悲虛懷疇昔時趙侯鴻  
寶氣獨負青雲姿羣有含妙識衆象懸清機雄談盡物變精義解人頤在  
陰旣獨善幽躍自爲疑踈彼千里足傷哉一尉欺陳生富清理卓犖兼文  
史思縟巫山雲調逸岷江水鏗鏘哀忠義感激懷知己負劍登薊門孤遊  
入燕市浩歌去京國歸守西山歧幽居探元化立言見千祀埋沒經濟情  
良圖竟云已坐憶平生遊十載懷嵩丘題書滿古壁採藥遍巖幽子微化  
金鼎僊笙不可求榮哉宋與陸名官美中州在亡一睽阻歧路方悠悠自  
余事山海及茲人世改傳聞當世榮皆入古人名無復平原賦空餘隣笛

聲泣對西州使悲訪北邙塋新墳蔓宿草舊闢毀殘銘爲君成此曲因言  
寄友生默語無窮事凋傷共此情

藏用字子潛幽州人初隱終南少室二山中時有意當世人目爲隨駕隱  
士晚乃徇權利司馬承禎將還山藏用指終南曰此中大有佳處承禎徐  
曰以僕視之仕宦之捷徑耳藏用終黃門侍郎

馬懷素

慈恩寺九日應制云季月啓重陽金輿陟寶坊御旗橫日道仙塔儼雲莊  
帝蹕千官從乾詞七耀光顧慙文墨職無以頌時康

中宗立春游苑應制云玄籥飛灰出洞房青郊迎氣肇初陽仙輿慙下宜  
春苑御醴行開薦壽觴映水輕苔猶隱綠緣堤弱柳未舒黃唯有栽花飾  
簪鬢相隨聖藻狎年光

興慶池侍宴應制云積水逶迤繞直城含虛皎鏡有餘清圖雲曲樹連緹  
幕映日中塘間綵旌賞洽猶聞簫管沸歡留更睹木蘭輕無勞海上尋仙

客卽此蓬萊在帝京

正月七日宴大明殿云日宇千門平旦開天容萬象列昭回三陽候節金  
爲勝百福延祥玉作盃就暖風光偏着柳辭寒雪影半藏梅何幸得參詞  
賦職自憐終乏馬卿才

安樂公主山莊云主家臺沼勝平陽帝幸歡娛樂未央掩映瑤窻交極浦  
參差繡戶遶廻塘泉聲百處歌傳曲樹影千重舞對行聖酒一霑何以報  
唯忻頌德奉時康

望春宮迎春應制云綵旆瑤輿俯碧潯行春御氣發皇心搖風細柳縈馳  
道映日輕花出禁林遍野園亭開帟幕連堤草樹狎衣簪謬參西掖霑堯  
酒願沐南薰解舜琴

送金城公主云帝子今何在重姻適異方離情愴宸掖引路遶關梁望絕  
園中柳悲纏陌上桑空余願黃鸝東顧憶廻翔

宴安樂公主新宅云鳳樓窈窕凌三襲翠幌玲瓏瞰九衢複道中宵留宴

衍彌令上客想踟躕

餞唐永昌云聞君出宰洛陽隅賓友稱觴餞路衢別後相思在何處祇應  
關下望仙鳧

餞唐州高使君云外牧資賢守斯人奉帝命淮南膺建隼渭北斬分符坐  
歎煙波隔行嗟物候殊何年昇美 迴看北城隅

餞許州宋司馬云穎川開郡邑角宿分躔野君非仲舉才誰應題輿者憫  
憫琴上鶴蕭蕭路傍馬嚴程若可留別袂希再把

懷素字惟白潤州人師李善武后時爲監察御史李迥秀歛賕諉法懷素  
劾罷之轉禮部外郎開元初爲昭文館學士

薛稷

送金城公主云天道寧殊俗慈仁乃戢兵懷荒寄赤子忍愛鞠蒼生月下  
瓊娥去星分寶婺行關山馬上曲相送不勝情

安樂公主山莊云主家園囿極新規帝郊遊豫奉天儀歡宴瑤臺鎬京集



賞賜銅山蜀道移曲閣交映金精板飛花亂下珊瑚枝借問今朝八龍駕  
何如昔日指仙池

望春宮迎春應制云九春風景足林泉四野雲霞敞御筵花鏤黃山繡作  
苑草圖玄灞錦爲川飛觴趁醉心迴日走馬爭先眼着鞭喜奉仙遊歸路  
遠直言行樂不言旋

宴安樂公主新宅云秦樓宴喜月徘徊妓筵銀燭滿庭開坐中香氣排花  
出扇後歌聲逐酒來

餞唐永昌云河洛風煙壯市朝送君飛鳧去漸遙更思明年桃李月花紅  
柳綠宴浮橋

餞許州宋司馬云令弟與名兄高才振兩京別序聞鴻雁離章動鶴鴿遠  
鵬追翰墨勝地寫丹青風月相思夜勞望潁川星

慈恩寺九日應制云寶宮星宿刳香塔鬼神功王遊盛塵外眷覽出區中  
日宇開初景天詞掩大風微臣謝時菊薄綵入芳叢

秋日還京陝西十里作云驅車越陝郊北顧臨大河隔河見鄉邑秋風水  
增波西登咸陽途日暮憂思多傅巖既紆鬱首山亦嗟峨操築無昔老探

薇有遺歌客遊既回換人生能幾何

杜子美云少保有古風得之陝郊篇謂此作也

稷善書畫畫蹤閣立本書師褚河南時稱買褚得薛不落節

稷字嗣通母魏鄭公女也爲中書舍人與從祖兄曜更踐兩省俱以詞章  
自名睿宗立自少常數日拜中書侍郎參知機務歷太子少保以翊贊功  
恩絕羣臣竇懷貞誅稷以知本謀賜死萬年獄

劉元濟

毛本云作元濟非當作允濟初學記另有劉元濟且不詳其爵里

詠琴詩云昔在龍門側誰想鳳鳴時雕琢今爲器宮商不自持巴人緩疎  
節楚客弄繁絲欲作高張引翻成下調悲

經廬岳迴望江山想洛川有作云龜山帝始營龍門禹初鑿出入經變化  
俯仰憑寥廓未若茲山功連延竝巫霍東北流良象西南距坤絡宏阜自  
鬱盤高標復迴薄勢入柴桑渚陰開彭蠡壑九江杳無際七澤紛相錯雲

煙散吳會風波騰鄩鄂

鄩一作鄩都

跡隨造化久利與乾坤博盼蠻精氣通紛綸

潛怪錯石渠忽見踐金房安可託地入天子都巖有仙人藥二門幾迢遞

三宮何儵爚咫尺窮杳冥跬步皆恬漠仙才驚羽翰幽居靜龍螭明牧振

雄詞棣華殊灼灼盛業匡西夏深謀贊禹亳黃雲覆鼎飛絳氣橫川躍佐

曆符賢運人期茂天爵禮樂富垂髻詩書成舞勺清輝靖岳電利器騰霜

鏘遊聖挹衢樽隣幾恭木鐸巖仞包武侯波瀾控文若旋聞刈薪楚遽覩

升葵藿稷離郭郭

一作序揆

圖良平公輔略重地資出守英藩諒求瘼豫章觀

偉材江州訪靈嶠陽岫曉氛氲陰崖暮蕭索潛伏屢鯨奔雄飛更鷲搏驚

獮透煙霞騰猿亂枝格故園有歸夢他山飛賞樂帝鄉徒可遊皇澗終旅

泊景物觀淮海雲霄望河洛城闕紫微星圖書青溪閣神功多粉績元氣

猶斟酌丞相下南宮將軍趨北落橫簪竝附蟬列鼎俱調鶴四郊時迷路

五月先投龠池榭宣瓊管風花亂珠箔舊遊勞夢寐新知無悅樂天寒欲

贈言歲暮期交約夜琴清玉柱秋灰變緹幕風雲動翰林宮徵調文籥言

泉激爲浪思緒飛成繳千里輝珠璣五采含丹雘鐘鼓旋驚鷄瑾瑜俄抵  
鵲竊價慙庸怠叨聲逾寂寞長望限南溟居然翳東郭此詩爲當時推最  
允濟字允濟河南人與王勃齊名垂拱四年明堂成奏賦述功德除著作  
郎鳳閣舍人坐二張昵狎除青州長史以內憂去官服除召爲修文館學  
士旣久斥喜甚與家人樂飲數日卒

李元紘

綠墀怨云征馬噪金珂嫖姚向北河綠苔行跡少紅粉淚痕多寶屋粘花  
絮銀箏覆網羅別君如昨日青海雁頻過  
相思怨云望月思氛氲朱衾懶更薰春生翡翠帳淚點石榴裙燕語時驚  
妾鶯啼轉憶君交河一萬里仍隔數重雲

元紘字大綱京兆人開元中爲相務峻崖檢抑奔競夸進者憚之宋璟曰  
李公引宋遙之美黜劉晁之貪身爲國相家無留儲雖季文子之德何以  
加之

送張說上集賢學士元紘應制得私字云碩儒延鳳詔金馬被鴻私饌玉  
還丹禁牋花降紫墀銜恩傾旨酒鼓舞詠康時暫觀羣書緝逾昭聖業不  
接筵歡有命擲管愧無詞自驚一何幸太陽還及葵

李嶠

三會寺應制云故臺蒼頡里新邑紫泉居歲在開金寺時來降玉輿龍形  
雖起利鳥跡尙留書竹是蒸青外池仍點墨餘天文光聖草寶思合眞如  
謬奉千齡且忻陪十地初

又陪幸臨渭亭遇雪詩云同雲接野煙飛雪暗長天拂樹添梅色過樓助  
粉妍光含班女扇韻入楚王紘六出迎仙藻千箱答瑞年

送沙門玄奘等還荊州詩云三乘歸淨域萬騎餞通莊就日離亭近彌天

別路長荊南旋杖鉢渭北限津梁何日紆眞果還來入帝鄉

毛本云或刻宋之問

幸太平公主南莊詩云主家山第接雲開天子春遊動地來羽騎參差花  
外轉霓旌搖颺日邊回還將石溜調琴曲更取峰霞入酒杯鸞輅已辭烏

鵲渚簫聲猶繞鳳凰臺

送張仁亶赴朔方應制云玉塞征驕子金符命老臣三軍張戍旆萬乘飾行輪猛氣凌玄朔崇恩降紫宸投醪還得士辭第本忘身露下鷹初學風高雁欲賓方銷塞北禊遂靜漠南塵

薦福寺應制云雁沼開香域鸚林降綵旃還窺圖鳳宇更坐躍龍川桂舉朝羣辟蘭宮列四禪半空銀閣斷分砌寶繩連甘雨樵蘇澤慈雲動沛篇獨慙賢作礪空喜福成田

陪遊苑中遇雪云散漫祥雲逐聖迴飄飄瑞雪遶天來不能落後爭飛絮故欲迎前賽早梅

翦綵花應制云幸聞年欲至翦綵學芳辰綴綠奇相似裁紅巧逼真花從篋裏發葉向手中春不與時光競何名天上人

人日清輝閣應制云三陽偏勝節七日最靈辰行慶傳芳蟻升高綴綠人階前莫候月樓上雪驚春今日銜天造還疑上漢津

安樂公主山莊云黃金瑞勝絳河隈白玉仙輿紫禁來碧樹青岑雲外聳  
朱樓畫閣水前開龍舟下瞰鮫人室羽節高臨鳳女臺遽惜歡娛歌吹晚  
揮戈卻使曜靈迴

人日大明宮應制云鳳城景色已含韶人日風光倍覺饒桂吐半輪迎此  
夜莫開七葉應今朝魚猜水凍行猶澀鸞喜春熙弄欲嬌愧奉登高搖紫  
翰忻逢御氣上丹霄

春日遊苑喜雨詩園棲春正歸入苑弄芳菲密雨迎仙步低雲拂玉衣危  
花霑易落度鳥溼難飛膏澤登千庾歡情徧九圍

送金城公主云漢帝撫戎臣絲言命錦輪還將弄機女遠嫁織皮人曲怨  
江山月妝消道路塵所嗟穠李樹空對小榆春

九日應制云令節三秋晚重陽九日歡仙杯還泛菊寶饌且調蘭御氣雲

霄近乘高宇宙寬今朝萬壽引宜向曲中彈

得數字毛本云此三字集中不載

正月中宗上清輝閣遇雪嶠賦詩云千鍾聖酒御筵披六出祥英亂繞枝

卽此神仙對瓊圃何煩轍跡向瑤池

毛本云集不載

七夕應制云靈匹三秋會仙期七夕過槎來人泛海橋渡鵲填河帝縷昇  
銀闕天機罷玉梭誰言七裏詠重入五絃歌

嶠汾陰行云君不見昔日西京全盛時汾陰后土帝親祠齋宮宿寢設厨  
供撞鐘鳴鼓樹羽旗漢家四葉才且雄賓延萬靈朝九戎柏梁賦詩高宴  
罷詔書法駕幸河東河東太守親掃除奉迎至尊導鑾輿五營將校列容  
衛三河縱觀空里閭回旌駐蹕降靈場焚香奠醑邀百祥金鼎發色正焜  
煌靈祇煒燁攄景光埋玉陳牲禮神畢舉麾上馬乘輿出彼汾之曲嘉可  
遊木蘭爲檝桂爲舟櫂歌微吟綵鷁浮簫鼓哀鳴白雲秋歡娛宴洽賜羣  
后家家復除戶牛酒聲明動天樂無有千秋萬歲南山壽自從天子向秦  
關玉輦金車不復還珠簾羽蓋長寂寞鼎湖龍髯安可攀千齡人事一朝  
空四海爲家此路窮雄豪意氣今何在壇場宮館盡蒿蓬路逢古老長歎  
息世事迴環不可測昔時青樓對歌舞今日黃埃聚荆棘山川滿目淚沾



衣富貴榮華能幾時不見只今汾水上惟有年年秋雁飛天寶末明皇乘  
春登勤政樓命梨園弟子歌數闋有唱歌至富貴榮華能幾時以下四句  
帝春秋衰邁問誰詩或對李嶠因淒然涕下遽起曰嶠真才子也及其年  
幸蜀登白衛嶺覽眺良久又歌是詞復曰嶠誠才子也高力士以下揮涕  
久之嶠有三戾性好榮遷憎人陞進性好文學憎人才華性貪濁憎人受

賂利州昭化縣之南境與劍門相接  
有鋪曰白衛鋪今其名見于此

嶠字巨山爲兒時夢人遺雙筆自是有文詞十五通五經二十擢進士第  
與駱賓王劉元業齊名相中宗其仕也初與王勃楊盈川接中與崔融蘇  
味道齊名晚諸人沒獨爲文章宿老一時學者取法焉

張仁亶自朔方入朝中宗于西苑迎之從臣宴于桃花園嶠歌曰歲去無  
言忽顛顛時來含笑吐氣氤氳不能擁路迷仙客故欲開蹊待聖君又一從  
臣歌曰源水叢花無數開丹跗紅萼閒青梅從今結子三千歲預喜仙遊  
復摘來明日宴承慶殿上令宮女善謳者唱之詞旣婉麗歌仍妙絕樂府

號桃花行

皮日休松窗雜錄云中宗常召宰相蘇瓌李嶠之子進見時皆童年帝謂曰汝等各以所通書取宜奏吾者言之頌應曰木從繩則正后從諫則聖嶠之子亡其名亦奏曰斯朝涉之脛剖賢人之心帝曰蘇瓌有子李嶠無兒

蘇瓌

九日應制云重陽早露晞睿賞瞰秋磯菊氣先薰酒萸香更襲衣清切絲桐會縱橫文雅飛恩深答効淺留醉奉宸暉

興慶池侍宴應制云金闕平明宿霧收瑤池侍宴俯清流瑞鳳飛來隨帝輦祥魚出戲躍王舟帷齊綠樹當筵密蓋轉細荷接岸浮如臨竊比微臣懼若濟叨陪聖主遊

瓌字昌容武功人以正立朝相中宗睿宗陳當世利病甚多

蘇頌

送金城公主云帝女出天津和戎轉鬪輪川經斷腸望地與析支隣奏曲  
風嘶馬銜悲月伴人旋知偃兵革長是漢家親

興慶池應制云降鶴池前迴步輦樓鸞樹杪出行宮山光積翠遙疑逼水  
態含青近若空直視天河垂象外俯窺京畫圖中皇歡未使恩波極日  
暮樓船更起風

宴安樂公主新宅云車如流水馬如龍仙史高樓十二重天上初移衡漢  
匹樓中歌舞夜相逢

餞唐州高使君云永日奏對時東風搖蕩夕浩然思樂事翻復餞征客淮  
水春池清楚山暮雲白勿言行路遠所貴專城伯

九日應制云并數登高日延齡命賞時宸游天上轉秋物雨來滋降鶴承  
仙馭吹花入睿詞微臣復何幸長得奉恩私

得時字

頴字廷碩幼敏悟一覽至千言初除左司禦率府曹參軍吏侍馬載曰古  
稱一日千里蘇生是矣長安中爲中書舍人時瓌同三品父子同在禁苑

時人榮之開元中爲相

世威瓌頌四  
世爲名宰相

寒食宴于中書舍兄弟宅云子推山上歌龍罷定國門前結駟來始覩元  
昆鏘玉至旋聞季子佩刀迴晴花處處因風起御柳條條向日開自有長

筵歡不極還持

將一作

綵服

一作  
勝詠南陔

和晦日駕幸昆明池云炎曆事邊陲昆明始鑿池豫遊光後聖征戰罷前  
規霽色清珍宇年芳入錦陂御杯蘭薦葉仙仗柳交枝二石分河寫雙珠  
代月移微臣比翔泳恩廣自無涯

瓌初未知頌一日有客詣瓌候于客次頌擁篲庭廡閒遺落一文字客取  
視之乃詠崑崙奴詩云指如十挺墨耳似兩張匙異之良久瓌出與客淹  
留言詠以其詩問瓌何人豈非是宗庶之孽也瓌備言其事客驚訝之請  
瓌加禮收舉必蘇氏之令子也瓌稍稍親之有人獻兔懸于廊廡瓌召令  
詠之曰兔子死蘭彈將來掛竹竿試將明鏡照何異月中看瓌覽詩異之  
由是學問日新文章蓋代及帝平內難日夕制詔絡驛無非頌之作時稱

小許云

人日侍宴大明宮應制云疏龍磴道切昭迴建鳳旗門繞帝臺七葉仙萸承月吐千株御柳拂煙開初年競帖宜春勝長命先浮獻壽杯是日最靈知竊幸羣心就捧大明來

頌初年有京兆尹過瓊命詠尹字曰丑雖有足甲不全身見君無口知伊少人

韋嗣立拜中書令瓊署官告頌爲之詞薛稷書時謂三絕

東明觀道士周彥雲欲爲其師立碑謂瓊曰成某志不過煩相君諸子五郎文

頌也

六郎書

說善八分

七郎致石瓊大笑口不言而心服其公

長安盛春遊頌製詩云飛埃結紅霧遊蓋飄青雲明皇嘉賞以御花親插其巾上當時榮之

望春宮應制云東望春光正可憐更逢晴日柳含煙宮中下見南山盡城上平臨北斗懸細草偏承迴輦處輕花微落奉觴前宸遊對此歡無極鳥

哢聲聲入管絃

扈從明皇出雀鼠谷應制云雨施巡方罷雲從訓俗迴密途汾水衛清蹕  
晉郊陪寒著山邊盡春當日下來御祠玄鳥應仙仗綠楊開作頌音傳雅  
觀文色動台更知西向洛宸藻協鹽梅

頌詩是  
惟此一篇  
明皇時作

唐詩紀事卷第十

唐詩紀事卷第十一

章嗣立

趙彥伯

閻朝隱

鄭愔

沈佺期

宋之問

徐堅

盧懷慎

武平一

李行言

章元旦

章嗣立

九日應制云層觀遠沈沈鑿旗九日臨帷宮壓水岸步輦入煙岑枝上萸

新採樽中菊始斟願陪歡樂事長與歲時深

得深字

嗣立在省閣與岳州張使君說譚州王都督熊聯事後承朝譴各東西相別詩云茂先王佐才作牧楚江隈登樓正欲賦復遇仲宣來黃鵠飛將遠雕龍文爲開寧知昔聯事聽曲有餘哀又云昔時陪二賢纓冕會神仙一去馳江海相逢共播遷無因千里駕忽覩四愁篇覽諷歡何已歡終徒愴然

嗣立中宗時爲大學士制云詞林佇秀學海資英苟非鴻儒孰副推擇守



太府卿章嗣立金籀襲慶玉鼎生才浴德澡身居忠履孝保淳懿之道綜  
虛明之識前言往行獨運襟靈健筆通文孤標望實早昇臺閣常典樞機  
誠亮險夷政敷匡益自出入中外周旋宦遊夕郎歸其峻寵冬卿美其誠  
務官曹內殿朝野旁求宜參右署之榮俾接金闈之彥可修文館大學士  
兄承慶長壽中與嗣立相代爲鳳閣舍人長安三年承慶代嗣立爲鳳閣  
侍郎頃之又代爲黃門侍郎四職相代時謂大郎罷相二郎拜相中宗授  
嗣立黃門侍郎制曰芝蘭並秀見謝石之階庭騏驥並驅有劉山之昆季  
又曰近者命於鸞渚已曜鴈行纔出芝烏奄歸蒿里永言荆樹坐折連枝  
眷彼常山空餘一鳥俾遷榮于阜蓋宜襲寵于黃樞

嗣立莊在驪山鸚鵡谷中宗幸之嗣立獻食百饗及木器藤盤等物上封  
爲逍遙公谷爲逍遙谷原爲逍遙原中宗留詩從臣屬和嗣立並鐫于石  
請張說爲之序薛稷書之李乂詩略云樞掖調梅暇林園種槿初入朝榮  
劍履退食樂琴書地隱東巖石天迴北斗車旌門臨窳窳輦路屬扶疎沈

佺期詩略云水堂開禹膳山閣獻堯鐘皇鑒清居遠天文睿獎濃武平一  
云三光迴斗極萬騎肅鉤陳地若遊汾水畋疑獵一作涓濱趙彥伯云廊  
廟心存巖壑中鑿輿矚在灞城東逍遙空有蒙莊子漢主徒言河上公張  
說序亦云嵐氣入野榛煙出谷魚潭竹岸松齋藥碗虹泉電射雲木虛吟  
恍惚疑夢閒關忘術茲所謂邱壑夔龍衣冠巢許也

開元中嗣立自湯井還都經其龍門北溪別業忽懷驪山之勝嘗有詩云  
幽谷杜陵邊風煙別幾年偶來伊水曲溪嶂覺依然傍浦憐芳木尋崖愛  
淥泉嶺雲隨馬足山鳥向人前地合心俱靜言因理自玄短才叨重寄尸  
祿媿妨賢每揖掛冠侶思從初服旋稻梁仍欲報歲月坐空捐助岳無纖  
芥輸溟謝末涓還悟北轅失方求南澗田時張說崔泰之崔日知在東都  
皆和焉先一日太平公主上官昭容題詩數篇故張說詩云舞鳳迎公主  
雕龍賦婕妤

趙彥伯

九日應制云九日報仙家三秋轉翠華呼鷹下鳥路戲馬出龍沙簪掛丹

萸藥杯涵紫菊花所願同微物年年共辟邪

得花字毛本云此詩第二聯與趙彥昭同

張仁亶來自朔方軍中宗迓之宴于桃花園應制曰紅萼競然春苑曙芊  
茸新吐御筵開長年願奉西王讌近侍慙無東朔才

彥伯爲弘文館學士

### 閩朝隱

送金城公主云甥舅重親地君臣厚義鄉還將貴公主嫁與耨檀

一作王

鹵簿山川闊胡琴道路長迴瞻父母國日出在東方

人日大明宮應制云勾芒人面乘兩龍道是春神衛九重綵勝年年逢七  
日醪醑歲歲滿千鐘宮梅間雪祥光徧城柳含煙瑞氣濃醉倒君前情未  
盡願因歌舞自爲容

宴安樂公主新宅云鳳凰鳴舞樂昌年蠟燭開花夜管絃半醉徐擊珊瑚  
樹已聞鐘漏曉聲傳

鸚鵡貓兒云鸚鵡惠鳥也貓不仁獸也飛翔其背焉嚙啄其頤焉攀之緣之蹈之履之弄之藉之踰踰然此爲自得彼亦以爲自得畏者無所起其畏忍者無所行其忍抑血屬舊故之不若臣叨踐太子舍人朝暮侍從預見其事聖上方以禮樂文章爲功業朝野歡娛強梁充斥之輩願爲臣妾稽顙闕下者日萬計尋而天下一統實以爲惠可以伏不惠仁可以伏不仁亦太平非常之明證事恐久遠風雅所缺再拜稽首爲之篇云霹靂引豐隆鳴猛獸噫氣蛇吼聲鸚鵡鳥同資造化兮殊粹精鸚鵡毛翡翠翼鵠鷓延頸鷓鷄弄色鸚鵡鳥同稟陰陽兮異埏埴彼何爲兮隱隱振振此何爲兮綠衣翠襟彼何爲兮窘窘蠢蠢此何爲兮好貌好音彷彿兮佯佯似妖姬躡步兮動羅裳趨趨兮踰踰若處子迴眸兮登玉堂爰有獸也安其忍觜其脅距其胸與之放曠浪浪兮從從容容鉤爪鋸牙也宵行晝伏無以當遇之兮忘味搏擊騰擲也朝飛暮噪無以拒逢之兮屏氣由是言之貪殘薄則智惠作貪殘臨之兮不復攬由是言之智惠周則貪殘囚知惠

犯之兮不復憂菲形陋質雖賤微皇王顧遇長光輝離宮別館臨朝市妙  
舞繁絃雜宮徵嘉喜堂前景福內和歡殿上明光裏雲母屏風文彩合流  
蘇斗帳香煙起承恩宴兮接宴喜高視七頭金駱駝平懷五尺銅獅子國  
有君兮國有臣君爲主兮臣爲賓朝有賢兮朝有德賢爲君兮德爲節千  
年萬歲兮心轉憶

奉和九月幸臨渭亭登高應制云九九侍神仙高高坐半天文章二曜動  
氣色五星連簪紱趨皇極笙歌接御筵願因吹菊酒相守百千年

得筵字

中宗立春遊苑應制云管籥周移寰極裏乘輿望幸斗城闈草根未結青  
絲縷蘿蔦猶垂綠帔巾鵲入巢中言改歲燕銜書上道宜新願得長繩繫  
取日光臨天子萬年春

送唐永昌赴東都詩洛陽難理若棼絲椎破連環定不疑鸚鵡鳥道長安  
樂迴首一顧一相思

授著作郎直學士制云朝隱夜光成寶朝陽擢秀文高一變藝總三端承

顧問于鸞掖掌圖書于麟府頃屬播遷獲返班序方來石室分曹已參于  
著述金門直事俾崇于伸獎可修文館直學士

朝隱字友倩趙州欒城人性滑稽屬辭奇詭爲武后所賞景龍時爲著作  
郎先天下中爲秘書少監坐事貶通州別駕卒

鄭愔

上幸薦福寺令賦詩云舊邸三乘闢佳辰萬騎留蘭圖奉葉偈芝蓋拂花  
樓國會人王法宮還天帝遊紫雲成寶界白水作禪流雁塔昌基遠鸚杯  
睿藻抽忻承大風曲竊預小童謳

三會寺應制詩云鳥籀遺新閣龍旗訪古臺造書臣頡往觀跡帝羲來睿  
覽山川而宸心宇宙該梵音隨駐輦天步接乘杯舊苑經寒露殘池問劫  
灰散花將捧日俱喜聖詞開

寺傳蒼頡造書臺

陪幸昭容院獻詩四首地軸樓居遠天台闕路賒何如遊帝宅卽此對仙  
家座拂金壺電池搖玉酒霞無云秦漢隔別訪武陵花

其一

堯祠姑射近漢

苑建章連十五莫知月三千桃記年鸞歌隨鳳吹鶴舞向鷓絃更覓瓊妃

伴來過玉女泉其二宮掖賢才重山林高士難不言辭輦地更有結廬歡池

棟清溫煥巖窗起沍寒幽亭有仙桂聖主萬春看其三槎流天上轉茅宇禁

中開河鵲填橋至山熊避檻來庭花採菽薜巖石步莓苔願奉蘿圖泰長

聞錦翰裁其四

陪幸長寧公主莊云公門襲漢環主第稱秦玉池架祥鱣宇山吹鳴鳳曲

拂席薜蘿垂迴舟芰荷觸平陽妙舞處日暮清歌續

望春宮迎春應制云宸蹕凌高轉翠旌春樓望遠背朱城忽排花上遊天

苑卻坐雲邊看帝京百草香心初冒蝶千林嫩葉始藏鶯幸同微藿傾陽

早願比盤根應候榮

送金城公主云下嫁戎庭遠和親漢禮優笳聲出虜塞簫曲比秦樓貴主

悲黃鶴征人怨紫駟皇情眷億兆割念俯懷柔

早朝雲端闕龍居峻宸庭鳳掖深才良寄天綍趨拜侶朝簪飛鳥看來影

喧車識駐音重軒輕霧入洞戶落花侵聞有題新翰依然想舊林同聲慙  
卞玉謬比託韋金塞外三篇塞外蕭條望征人此路賒邊聲亂朔馬秋色  
引胡笳遙嶂侵歸日長城帶晚霞斷蓬飛古戍連鴈聚寒沙海暗雲無葉  
山春雪作花丈夫期報主萬里獨辭家其一荒壘三秋夕窮郊萬里平海陰  
凝獨樹日氣下連營戎旆霜疑重邊裘夜更輕將軍猶轉戰都尉不成名  
折柳悲春曲吹笳斷夜聲明年漢使返須築受降城其二陽烏南飛夜陰山  
北地寒漢家征戍客年歲在樓蘭玉關朔風起金河秋月團邊聲入鼓吹  
霜氣下旌竿海外歸書斷天涯旅鬢殘子卿猶奉使常向節旄看其三  
人日侍宴大明宮云瓊殿含光映早輪玉鑿初躡望初晨池開凍水仙宮  
麗樹發寒花禁苑新佳氣徘徊籠細網殘翼淅瀝染輕塵良時荷澤皆迎  
勝窮谷晞陽猶未春

哭郎著作云詩禮康成學文章賈誼才已年人得夢庚日烏爲災書草藏  
天閣琴聲入夜臺荒階羅駁蘚虛座滿浮埃白馬賓從散青烏隴隧開悲



涼門館下懷舊幾遲迴

秋閨詩云征客向輪臺幽閨寂不開音書秋鴈斷機杼夜蛩催虛幌風吹  
葉閒堦霜露染苔自憐愁思影常共月徘徊

惜樂府採蓮曲云錦楫沙棠艦羅帶石榴裙綠潭採荷芰清江日稍曛魚  
鳥爭唼喋花葉相芬氲不覺湘川暮菱歌處處聞

胡笳曲云漢將留邊朔遙遙歲序深誰堪牧馬思正是胡笳吟曲斷關山  
月聲悲雨雪陰傳書向蘇武陵也獨何心

折楊柳云青柳映紅顏黃雲蔽紫關忽聞邊使出枝葉爲君攀舞腰愁欲  
斷春心望不還風花滾成雪羅綺亂斑斑

夜遊曲云漢室歡娛盛魏國文雅適許史多暮宿應陳從夜遊西園燕公  
子北里召王侯詎似將軍獵空嗟亭尉留

少年行云潁川豪橫客咸陽輕薄兒田竇方貴幸趙李新相知軒蓋終朝  
集笙竽此夜吹黃金盈篋筥白日忽西馳

唐永徽以來唱桑條歌云桑條章也女章也神龍時逆韋應之惜作桑條樂詞十首以進擢吏侍

惜字文靖年十七進士擢第神龍中爲中書舍人與崔日用趙履溫李峴等託武三思權薰炙中外天下語曰崔冉鄭亂時政冉祖雍也或曰初附來俊臣俊臣誅附易之易之誅託韋庶人後附譙王卒被戮

### 沈佺期

陪幸太平公主南莊詩云主第山門起灞川宸遊風景入初年鳳凰樓下交天仗烏鵲橋頭敞御筵往往花閒逢綵石時時竹裏見虹泉今朝扈蹕平陽館不羨乘槎雲漢邊

九日臨渭亭云御氣幸金方憑高薦羽觴魏文頌菊藥漢武賜萸房秋變

銅池色晴添玉樹光年年重九慶日月奉天長

毛本云時刻秋變一聯作去鶴留笙吹歸鴻識舞行

陪幸韋嗣立莊云台階好赤松別業對青峯茆室承三顧花源接九重虹旗縈秀木鳳輦拂疎筇逕直千官擁溪長萬騎容水堂開禹膳山閣獻堯

鍾皇鑑清居遠天文睿獎濃巖泉他夕夢漁釣往年逢共榮丞相府偏降  
逸人封

白鹿觀應制云紫鳳真人府斑龍太上家天流芝蓋下山轉桂旌斜聖藻  
垂寒露仙杯落晚霞唯應問王母桃作幾時花

上巳陪駕渭濱云寶馬香車清渭濱紅桃碧柳禊堂春皇情尙憶垂竿佐  
天瑞先呈捧劍人

陪幸五王宅云北闕垂旒暇南宮聽履迴天臨翔鳳轉恩向濯龍開蘭氣  
承僊帳榴花引御杯日從金穴吐雲是玉衣來池影搖歌席林香散舞臺  
不知行漏晚清蹕尙徘徊

安樂公主莊云皇家貴主學神仙別業初開雲漢邊山出盡如鳴鳳嶺池  
成不讓飲龍川妝樓翠幌教春住舞閣金鋪借日懸景從乘輿來此地稱  
觴獻壽樂鈞天

人日大明宮應制云拂旦鷄鳴仙衛陳憑高龍首帝庭春千官黼帳杯前

壽百福香奩勝裏人山鳥初來猶怯囀林花未發已偷新天文正應韶光  
轉設報懸知用此辰

望春宮迎春應制云芳郊綠野散春晴復道離宮煙霧生楊柳千條花欲  
綻葡萄百丈蔓初縈林香酒氣元相入鳥囀歌聲各自成定是風光牽宿  
醉來晨復得幸昆明

晦日澆水應制云素滌接宸居青門盛祓除摘蘭喧鳳野浮藻溢龍渠苑  
蝶飛殊嬾宮鷺囀不疎景移天上入歌舞向儲胥

送金城公主云金勝扶丹掖銀河屬紫闈那堪將鳳女還似嫁烏孫玉就  
歌中怨珠辭掌上恩西戎非我匹明主至公存

錢唐永昌云洛陽舊有神明宰輦轂由來天地中餘邑政成何足貴因君  
取則四方同

早朝云闔闔連雲起巖廊拂霧開玉珂龍影度珠履鴈行來長樂宵鐘徹  
明光曉奏催一經推舊德五字擢英才儼若神仙去紛從霄漢迴千春奉

休曆分禁喜趨陪曝衣篇云君不見昔日宜春太液邊披香畫閣與天連  
燈花灼爍九微映香氣氤氳百和然此夜星繁河正白人傳織女牽牛客  
宮中擾擾曝衣樓天上娥娥紅粉席曝衣何許曛半黃宮中綵女提玉箱  
珠履奔騰上蘭砌金閨宛轉出梅梁絳河裏碧煙上雙花伏兔夾屏風四  
子盤龍擎斗帳舒羅散縠雲霧開綴玉垂珠星漢迴朝霞散彩羞衣架曉  
月分光劣鏡臺上有仙人長命錦一作綵中看玉女迎歡繡玳瑁筵中別作  
春珊瑚窗裏翻成書椒房金屋寵新流意氣嬌奢不自由漢文宜惜露臺  
產晉武須燒前殿裘

和晦日駕幸昆明池云法駕乘東轉神池象漢迴雙星移舊石孤月隱殘  
灰戰鷁逢時去恩魚望幸來岸花緹騎遶堤柳幔城開思逸橫汾唱歡流  
宴鎬杯微臣凋朽質羞覩豫章材

白鹿觀應制云四郊秦漢國八水帝王都閭闔雄里閭宮闕壯規模貫渭  
稱天邑含岐實奧區金門披玉館因此識皇圖

主第夜宴云濯龍門外主家親鳴鳳樓中天上人自有金杯迎甲夜還將綺席發陽春

酬蘇味道夏晚省中云並命登仙閣分宵直禮闈太官供宿膳侍史護朝衣卷幔天河入開窻月露微小池殘暑退高樹早涼歸冠劍無時釋軒車待漏飛明朝題漢柱三署有光輝

和楊再思春夜宿直云西禁青春滿南端皎月微千廬宵駕合五夜曉鐘稀星斗橫綸閣天河度瑣闈煙花章奏裏紛向夕郎飛

和崔正諫登秋日早朝云鷄鳴朝謁滿露白禁門秋爽氣臨旌戟朝光映冕旒河宗來獻寶天子命焚裘獨負平津一作陽議言從建禮遊

巫山高云巫山高不極合沓奇狀新暗谷疑風雨陰崖若鬼神月明三峽曙潮滿九江春爲問陽臺客應知入夢人此詩范攄以爲佺期之作而顧陶以爲張循今記于此

張燕公說嘗謂佺期曰沈三兄詩須還他第一佺期字雲卿相州人除給

事中考功郎受賊劾未究會張易之敗遂長流驩州稍遷台州錄事參軍  
入許召見拜起居郎兼修文直學士侍宴爲弄辭悅帝賜牙絳尋爲太子  
詹事開元初卒任期迴波樂詞云迴波爾時任期流向嶺  
外生歸身名已蒙齒錄袍笏未復牙絳魏建安後訖江  
左詩律屢變至沈約庾信以音韻相婉附屬對精密及宋之間沈佺期更  
加靡麗回忌聲病約句準篇如錦繡成文學者宗之號爲沈宋語曰蘇李  
居前沈宋比肩謂蘇武李陵也

### 宋之問

芙蓉園應制云芙蓉秦地沼盧橘漢家園谷轉斜盤徑江迴曲抱源風來  
花自舞春入鳥能言侍宴瑤池夕歸途笳一作騎吹繁

三會寺應制云六飛迴玉輦雙樹謁金仙瑞鳥呈眞宇神龍吐浴泉淨心  
遙證果睿想獨超禪塔湧香花地山圍日月天梵音迎雨散空樂倚雲懸  
今日登仁壽長看法鏡圓

薦福寺應制云梵筵光聖邸遊豫覽宏規不改靈光殿因開功德池蓮生

新步葉桂長昔攀枝踴塔天中見飛樓海上移聞韶三月幸觀象七星危  
欲識龍歸處朝來雲氣隨

陪遊宴遇雪云紫禁仙輿詰旦來青旗遙倚望春臺不知庭霰今朝落疑  
是林花昨夜開

餞許州宋司馬云潁郡水東流荀陳兄弟遊偏傷茲日遠獨向聚星州河  
潤在明德人康非外求當聞力爲政遙慰我心愁

謁禹廟云夏王乘四載茲地發金符駿命終不易報功疇敢渝先驅總昌  
會後至伏靈誅玉帛空天下衣冠照海隅旋聞厭黃屋更道出蒼梧林表  
祠轉茂山阿井詎枯舟遷龍負壑田變鳥芸蕪舊物森如在天威肅未殊  
玄夷屈瑤席席玉女侍清都奕奕扃圍邃軒軒仗衛趨氣青連曙海雲白  
洗春湖猿嘯有時答禽言長自呼靈歆異蒸縉至樂匪笙竽茅殿今文襲  
梅梁古制無運遙日崇麗業盛答昭蘇伊昔力云盡而今功尙敷揆才非  
美箭精享愧生芻郡職昧爲理邦空寧自誣下車霰已積攝事露行濡人



隱冀多祐曷惟霑薄軀

詠海云肅事祠春溟宵齊洗蒙慮雞鳴見日出鷺下驚濤驚地闊八荒近  
天迴百川澍筵端接空曲日外唯雰霧暖氣象來周遊晦明互致腥匪  
玄享禋滌期靈煦的的波際禽沄沄島間樹安期今何在方丈蔑尋路仙  
事與世隔冥搜徒已屢四明背羣山遺老莫辨處內撫良自慨弱齡忝恩  
遇三入文史林兩拜神仙署雖歎出關遠始知臨海趣賞來空自多理勝  
孰能喻留楫竟何待徒倚歲云暮

浣紗篇贈陸上人云越女顏如花越王聞浣紗國微不自寵獻作吳宮娃  
山藪半潛匿苧羅更蒙遮一行霸句踐再笑傾夫差艷色奪人目效颦亦  
相誇一朝還舊都靚妝尋若耶林鳥驚入松網魚畏沈花始覺冶容妄方  
悟君心邪欽子秉幽意世人共稱嗟願言託君懷儻類蓬生麻家住雷門  
曲高閣凌飛霞淋漓翠羽帳旖旎綠雲車春風豔楚舞秋月綿胡笳自昔  
專嬌愛翫襲惟矜奢達本知空寂棄彼猶泥沙永割偏執性日長薰修牙

携妾不障道願止妾西家

中宗幸薦福寺獻詩云香刹中天起宸遊滿路輝乘龍太子去駕象法王  
歸殿飾金人影窗搖玉女扉稍迷新草木徧識舊庭闈水入禪心定雲從  
寶思飛欲知皇劫遠初拂六銖衣

立春日侍宴內殿出翦綵花詩云金閣裝新杏瓊筵弄綺梅人閒都未識  
天上忽新開蝶繞香絲住蜂憐豔粉回今年春色早應爲翦刀催

陪幸公主南莊詩云青門路接鳳凰臺素滻宸遊龍騎來澗草自迎香輦  
合巖花應對御筵開文移北斗成天象酒近南山作壽盃此日侍臣將石

去共歡明主錫金迴

之問薦福寺昆明池  
及此作都爲冠首

明河篇云八月涼風天氣晶萬里無雲河漢明昏見南樓清且淺曉落西  
山縱復橫洛陽城闕天中起長河夜夜千門裏復道連甍共蔽虧畫堂瓊  
戶特相宜雲母帳前初汎濫水晶簾外轉透池倬彼昭回如練白復出東  
城接南陌南陌征人去不歸誰家今夜搗寒衣鴛鴦機上疎螢度烏鵲橋

邊一鴈飛鴈飛螢度愁難歇坐見明河漸微沒明河可望不可親願得乘  
槎一問津更將織女支機石還訪成都賣卜人蓋之問求爲北門學士天  
后不許故此篇有乘槎訪卜之語后見其詩謂崔融曰吾非不知其才但  
以其有口過爾之問終身恥之

口過齒疾

武后遊洛南龍門命從臣賦詩先成

者賜以錦袍左史東方虬詩成拜賜坐未安之問詩成文理兼美左右莫  
不稱善乃就奪錦袍衣之其詞曰宿雨霽氛埃流雲度城闕河堤柳新翠  
苑樹花初發洛陽花柳此時濃山水樓臺映幾重羣公拂霧朝翔鳳天子  
乘春幸鑿龍龍門近出王城外羽從淋漓擁軒蓋雲蹕纔臨御水橋天衣  
已入香山會山壁嶄巖斷復連清流澄澈俯伊川塔影遙遙綠波上星龕  
奕奕翠微邊層巒舊長千尋木春壑初飛百尺泉綵仗蜺旌遶香閣下輦  
登高望河洛東城宮闕擬昭回南陌溝塍殊綺錯林下天香七寶臺山中  
春酒萬年盃微風一起祥花落仙樂初鳴瑞鳥來鳥來花落紛無已稱觴  
獻壽煙霞裏歌舞淹留景欲斜石閒猶駐五雲車鳥旗翼翼留芳草龍騎

駸駸映晚花千乘萬騎鸞輿出水靜山空嚴警蹕郊外喧喧引看人傾城  
南望屬車塵囂聲引颺開黃道王氣周迴入紫宸先王定鼎山河固寶命  
乘周萬物新吾皇不事瑤池樂時雨來觀農扈春

詠省壁畫鶴詩云粉壁圖仙鶴昂藏真氣多鸞飛竟不去當是戀恩波  
韋善心爲郎中善剖決之問善詩時謂戶部二妙之問字延清汾州人與  
侄期元濟媚附易之及敗貶瀧州參軍事逃歸復附三思景龍中諂事太  
平公主安樂公主權盛復往諧結太平深嫉之中宗將用爲中書舍人太  
平發其贓下遷越州長史賦詩流傳京師睿宗立以獯險盈惡詔流欽州  
賜死

徐堅

送金城公主云星漢下天孫車服降殊藩匣中詞易切馬上曲虛繁關塞  
移朱帳風塵照錦軒簫聲去日遠萬里望河源

餞許州宋司馬云舊許星車轉神京祖帳開斷煙傷別坐零雨送離盃辭

燕依空遶賓鴻入聽哀分攜與秋氣日夕共悲哉

餞唐永昌赴任東都云郎官出宰赴伊瀟征傳駸駸灞水前此時長望新  
豐道攜手相看共黯然

餞考功武員外學士使嵩山置舍利塔歌云伊川別騎灞岸分筵對三春  
之花月覽千里之風煙望青山兮分地見白雲兮在天寄愁心于樽酒愴  
離緒于清絃共握手而相顧各銜悽而黯然

已上中  
宗時作

堅字元固西臺舍人齊晦之子善屬文曲厚楊再思每日爲鳳閣舍人樣  
中宗時爲給事中明皇改麗正書院爲集賢院以堅充學士不爲章句之  
學而窮覽洽聞綿歷四朝以謹厚稱

送張說巡邊應制云至德撫遐荒神兵赴朔方帝思元帥重爰擇股肱良  
累相承安世深籌協子房寄崇專斧鉞禮備設壇場鞞鼓喧雷電戈劍凜  
風霜四騏將戒道十乘啟先行聖錫加常錫天光曜寵光出郊開帳飲寅  
餞盛離章雨濯梅林潤風秋麥野涼燕山應勒頌麟閣佇名揚

堅卒張說挽歌云才美臨淄北名高淮海東羽儀三省徧漁獵五車通玉  
殿孤新榜珠英落舊叢徒存一寶劍何處訪徐公

盧懷慎

九日應制云時和素秋節宸豫紫機關鶴似聞琴至人疑宴鎬還曠望迷  
平野潺湲俯暝灣無因酬大德空此媿崇班

得還字

懷慎靈昌人開元初與姚崇同相時譏爲伴食然能清儉以直道始終

武平一

駕幸溫泉詩云秦王登碣石周后襲崑崙何必在遐遠方稱萬寓尊我皇  
順時豫星駕動軒轅雄騎交馳道清笳度國門迴輿長樂觀校獵上林園  
行漏移三象連營總八屯旌搖鸚鵡谷騎轉鳳凰原絕壁蒼苔古靈泉碧  
溜溫參差開水殿竚篠敞巖垣豐邑蹤猶在驢宮跡尙存煙松銜翠幄雪  
逕遶花源侍從推玄草文章召武賁深仁浹夷夏洪造溢乾坤謬忝王枚  
列多慙雨露恩

景龍四年正旦賦柏樹詩云綠葉迎春綠寒枝歷歲寒願將柏葉壽長奉  
萬年歡

興慶池云鑾輿羽駕直城隈帳殿旌門此地開皎潔靈潭圖日月參差畫  
舸結樓臺波搖岸影隨橈轉風送荷香逐酒來願奉皇權常不極長遊雲  
漢幾昭迴

白鹿觀應制云玉府凌二曜金壇駐六龍綠旒懸倒景羽蓋偃喬松玄圃  
靈芝秀華池瑞液濃謬因霑舜酒長願祝堯封

送金城公主云廣化三邊靜通姻四海安還將剡下愛特副域中歡聖念

飛玄藻仙儀下白蘭日斜征蓋沒歸騎動鳴鸞

毛本云集載此題詩云鑾與上碧天翠帟拖晴煙絕

嶠紆仙逕層巖敞御筵雲披丹鳳闕日下黑龍川更  
觀南薰奏流聲入管絃與此絕不相同未知孰是

宴安樂公主新宅云王孫帝女下仙臺金榜珠簾日夜開遽惜瓊筵懽正

洽惟愁銀箭曉相催

餞唐永昌云聞君墨綬出丹墀雙鳥飛來佇有期寄謝銅街攀柳日無忘

粉署握蘭時

正月八日立春內出綵花賜近臣應制云鑿輅青旂下帝臺東郊上苑望  
春來黃鶯未解林閒囀紅藥光從殿裏開畫閣條風初變柳銀塘曲水半  
含苔欣逢睿藻光韶律更促霞觴畏景催是日中宗手勅批云平一年雖  
最少文甚警新悅紅藥之先開訝黃鶯之未囀循還吟咀賞歎兼懷今更  
賜花一枝以彰其美所賜學士花並令插在頭上後所賜者平一左右交  
插因舞蹈拜謝時崔日用乘酣飲欲奪平一所賜花上于簾下見之謂平  
一曰日用何爲奪卿花平一跪奏曰讀書萬卷從日用滿口虛張賜花一  
枝學平一終身不獲上及侍臣大笑因更賜酒一盃當時歎美  
中宗宴安樂公主新宅應制云紫漢秦樓敞黃山魯館開簪裾分上席歌  
舞列平臺馬旣如龍至人疑學鳳來幸忻聯棣萼何以接鄒枚  
人日西臺觀打毬應制云令節重遨遊分鑣戲綵毬驂迴上苑蹀躞繞  
通溝影就紅塵沒光隨赭汗流賞闌清景暮歌舞樂時休



平一名甄以字行武后時畏禍隱嵩山中宗雖宴豫嘗因詩規誠然不能卓然自引去明皇時終亦被謫雖謫而名不衰

李行言

秋晚度廢關云秦郊平舊險周德眷遺黎始聞清夜柝俄見落封泥物色來無限津途去不迷空亭誰問馬閒戍但鳴鷄山月寒彌淨河風曉更淒贈言楊伯起非復是關西

景龍中中宗引近臣宴集令各獻伎爲樂張錫爲談容娘舞宗晉卿舞渾脫張洽舞黃鸞杜元琰誦婆羅門呪行言唱駕車西河盧藏用效道士上章國子司業郭山輝請誦古詩兩篇誦鹿鳴蟋蟀未畢李嶠以詩有好樂無荒之語止之言行言隴西人兼文學幹事函谷關詩爲時所許中宗時爲給事中能唱步虛歌帝七月七日御兩儀殿會宴帝命爲之言行于御前長跪作三洞道士音詞歌數曲貌偉聲暢上頻歎美

韋元旦

正月七日宴大明殿詩云鸞鳳旌旂曉夕陳魚龍角觝大明晨青韶既肇  
人爲日綺勝初成日作人聖藻凌雲裁柏賦仙歌從宴摘梅春垂旒一慶  
宜年酒朝野俱歡薦壽新

安樂公主山莊云銀河南渚帝城隅帝輦平明出九衢刻鳳蟠螭陵桂邸  
穿池壘石寫蓬壺瓊簫暫下鈞天樂綺綴長懸明月珠仙榜承恩爭既醉  
方知朝野更歡娛望春宮迎春應制云九重樓閣半山霞四望韶陽春未  
賒侍蹕妍歌游灞浹留觴舞態出京華危竿競捧中街月戲鳥爭銜上苑  
花景色歡娛長若此承恩不醉不還家

送金城公主云柔遠安夷俗和親重漢年軍容旌節送國命錦車傳琴曲  
悲千里簫聲戀九天唯應西漢月來就掌珠圓

餞唐州高使君云桐柏膺新命芝蘭惜舊遊鳴臯夜鶴在遷木早鷺求傳  
擁淮源路罇空灞水流落花分送遠春色別離憂

早朝云震維芳月季宸極衆星尊佩玉朝三陛鳴珂過九門挈壺分早漏

伏檻耀初暎北倚蒼龍闕西臨紫鳳垣詞庭草雖視溫室樹無言鱗翰空  
爲忝長懷聖主恩中宗立春遊苑應制云灞涘長安常近日殷正臘月早  
迎新池魚戲葉仍含凍宮女栽花已作春向苑雲疑承翠幄入林風若起  
青蘋年年斗柄東無限願挹瓊觴壽北辰

中宗時興慶池侍宴應制云滄池漭沆帝城邊殊勝昆明鑿漢年夾岸旌  
旗疏遠道中流簫鼓振樓船雲峯四起迎宸幄寶樹千重入御筵宴樂已  
深魚鳥詠承恩更欲奏甘泉

主第夜宴云主第新成雲作榜賓筵廣宴玉爲樓壺觴旣卜仙人夜歌舞  
疑停織女秋

元旦京兆萬年人與張易之姻屬易之敗貶感義尉舅陸頌妻韋后弟也  
元旦憑以復進終中書舍人

唐詩紀事卷第十二

畢乾泰

辛替否

王景

韋安石

竇希玠

李咸

陸景初

鄭南金

于經野

解琬

麴瞻

樊忱

孫佺

李從遠

周利用

楊廉

張景源

李恒

已上景龍  
應制羣臣

畢乾泰

慈恩寺九日應制云鸚林化塔啓鳳輦順時遊重九昭皇慶大千揚帝休  
耆闍妙法闡王舍睿文流至德覃無極小臣歌詎酬

辛替否

慈恩寺九日應制云洪慈均動植至德俯深玄出豫從初地登高適梵天  
白雲飛御藻慧日暖皇編別有秋原藿長傾雨露緣

替否字協時京兆人景龍中爲左拾遺以直諫遷右臺殿中侍御史爲憲  
司彈擊不避強禦累遷穎王府長史卒

王景

慈恩寺九日應制云玉輦移中禁珠梯覽四禪重階清漢接飛竇紫霄懸  
綴葉披天藻吹花飲御筵無因鑿蹕暇俱舞鸛林前

景太原人爲司門員外郎萊州刺史子之咸爲長安尉昆弟之賁之渙皆  
善屬文之咸之子緯有傳

韋安石

九日侍宴應制云重九開秋節得一動宸儀金鳳飄菊藥玉露泫萸枝  
睿覽八紘外天文七曜披臨深應在卽居高豈慮危

得枝字

安石京兆人久視中爲相二張三思橫寵安石數析辱之復相中宗不附  
太平公主睿宗時爲姜晦所劾貶黜發憤卒

竇希玠

九日應制云鑾輿巡上苑鳳駕瞰層城御座丹烏麗宸居白鶴驚玉旗  
綵桂葉金杯汎菊英九晨陪聖膳萬歲奉承明

得明字

八月中宗令學士尋勝同宴於禮部尚書竇希玠林亭張說製序云召絲竹於伶官借池亭於貴族雕俎在席金羈駐門遠山片雲隔層城而卽興繁鸞芳樹遶高臺而共樂

夏日帝幸五王第乃過希玠宅劉憲詩云北斗樞機任西京肺腑親李乂詩云貴遊開北第宸眷幸西鄉

按希玠武德時內史令威之後中宗時爲禮書以恩澤賜實封開元爲太子少傅世爲外戚唐世貴盛莫與爲比

李咸

九日應制云重陽乘令序四野開晴色日月數初并乾坤聖登極菊黃迎酒泛松翠凌霜直遊海難爲深負山徒倦力

得直字

陸初景

九日應制云九秋光順豫重節霽良辰登高識漢苑問道侍軒臣菊花浮柅鬯萸房挿繒紳聖化謐邊垂長洲鴻鴈濱

得臣字

景初元初之子恬靜寡欲議論高簡景雲中與崔湜同知政事睿宗曰子能紹先業是謂象賢乃賜名象先

鄭南金

九日應制云重陽玉律應萬乘金輿出風起韻虞絃雲開吐堯日菊花浮聖酒茱萸香挂襄質欲知恩煦多順動觀秋實

得日字

于經野

九日應制云御氣三秋節登高九曲門桂筵羅玉俎菊體溢芳樽遵渚歸鴻度承雲舞鸛騫微臣濫陪賞空荷聖明恩

得樽字

經野中宗時爲戶部尙書

中宗九日登高應制二十四人韋安石蘇瓌詩先成于經野及盧懷慎詩後成時景龍二年也

解琬

慈恩寺九日登塔應制云瑞塔臨初地金輿幸上坊空邊有清淨覺處無

馨香雨霽微塵歛風秋定水涼茲辰採仙菊薦壽慶重陽

晦日宴高氏林亭云主第簪裾出王畿春照華山亭一已眺城闕帶煙霞  
橫堤列錦帳傍浦駐香車歡娛屬晦節酌酊未還家

琬魏州元城人與郭元振善習邊事守邊積二十年開元中終同州刺史

麴瞻

慈恩寺九日應制云扈蹕遊玄地陪仙瞰紫微似邁銖衣却將同羽化飛  
雕戈秋日麗寶劍曉霜霏獻觴乘菊序長願奉天暉

樊忱

慈恩寺九日應制云淨境重陽節仙遊萬乘來插萸登鷲嶺把菊坐蜂臺  
十地祥煙合三天瑞景開秋風詞更遠竊抃樂康哉

孫佺

慈恩寺九日應制云應節萸香滿初寒菊浦新龍旗煥辰極鳳駕儼香闈  
蓮井偏疑夏梅梁更若春一忻陪應塔還似得天身



佺麟德宰相處約之子延和初爲幽州都督爲奚所敗同周以弟見獲送  
默啜所殺之佺不知兵始裴懷古爲都督馭士有方朝廷以佺代之遂及  
敗

李從遠

慈恩寺九日應制云九月從時豫三乘爲法開中霄日天子半座寶如來  
摘果珠盤獻攀萸玉輦迴願將塵露點遙奉光明臺

周利用

慈恩寺九日應制云出輿乘金節飛文煥日官萸房開聖酒杏苑被玄功  
塔向三天迴禪收八解空叨恩奉蘭籍終愧洽薰風

金城公主和蕃中宗送至馬嵬羣臣賦詩帝令御史大夫鄭惟忠及利用  
護送入蕃學士賦詩以餞徐彥伯爲之序云

楊廉

九日侍宴應制云遠日瞰秦堦重陽坐灞亭旣開黃菊酒還降紫微星蕭

鼓諳仙曲山河入畫屏幸茲陪宴喜無以效丹青

得亭字

慈恩寺九日應制云萬乘臨真鏡重陽眺遠空慈雲浮鴈塔定水映龍宮  
寶鐸含飈響仙輪帶日紅天文將瑞色輝煥滿寰中

沈佺期酬楊給事中廉見贈臺中詩云子雲惟辯博公理擅詞雄始自尙  
書省旋聞給事中言從溫室祕籍向鎖闈通

張景源

慈恩寺九日應制云飛塔凌霄起宸遊一屆焉金壺新泛菊寶座卽披蓮  
就日搖香輦憑雲出梵天祥氛與佳色相伴雜鑪煙

李恒

慈恩寺九日應制云寶地隣丹掖香臺瞰碧雲關山江水出城闕樹中分  
睿藻蘭英秀仙杯菊蕊薰願將今日樂長奉聖明君

唐詩紀事卷第十二

唐詩紀事卷第十三

崔液

張元一

劉希夷

鄭遂初

王熊

房融

張敬忠

崔珪

沈祖仙

盧崇道

徐安期

張紘

薛曜

袁暉

李休烈

邵士彥

吳大江

劉幽求

賈曾

楊齊哲

魏元忠

李夔

司馬承禎

崔液

上元詩六首云玉漏銅壺且莫催鐵關金鎖徹明開誰家見月能閒坐何處聞燈不看來

今年春色勝常年此夜風光最可憐鳩鵲樓前新月滿鳳凰臺上寶燈燃神燈佛火百輪張刻象圖容七寶裝影裏如聞金口說空中似放玉豪光金勒銀鞍控紫騮玉輪珠璣駕青牛驂驪始散東城曲倏忽還來南陌頭公子王孫意氣驕不論相識也相邀最憐長袖風前弱更賞新絃暗裏調

星移漢轉月將微  
露灑煙飄燈漸稀  
猶惜道傍歌舞處  
踟躕相顧不能歸  
液字潤甫仁師之子  
湜之弟也工五言  
舉進士第一人湜嘗曰  
液子我家龜龍也  
官至殿中侍御史坐湜  
故亡命郢州作幽征賦  
以見意遇赦還卒

### 張元一

武后朝左司郎中張元一善滑稽時西戎犯邊武懿宗統兵禦之至邠畏懦而遜懿宗短陋元一嘲曰長弓短度箭蜀馬臨高蹠去賊七百里隈墻獨自戰忽然逢着賊騎猪向南趨則天未曉曰懿宗無馬耶元一曰騎猪夾豕也則天大笑后嘗問元一外有何事曰有三慶旱而雨洛橋成郭洪

霸死

洪霸酷吏也

### 劉希夷

將軍行云將軍闢轅門耿介當風立  
諸將欲言事逡巡不敢入劍氣射雲  
天鼓聲破原隰黃塵塞路起走馬追兵急  
彎弓從此去飛箭如雨集截圍  
一百里斬首五千級代馬流血死  
胡人抱鞍泣古來養甲兵有事常討襲

乘我廟堂運坐使干戈戢獻凱歸帝京軍容何翕習

悲代白頭翁云洛陽城東桃李花飛來飛去落誰家洛陽兒女惜顏色行  
逢落花長歎息今年花落顏色改明年花開誰復在已見松栢摧爲薪更  
聞葉田變爲海古人無復洛城東今人還對落花風年年歲歲花相似歲  
歲年年人不同寄言全盛紅顏子須憐半謝白頭翁此翁白頭真可憐伊  
昔紅顏美少年公子王孫芳樹下清歌妙舞落花前光祿臺前開錦繡將  
軍樓閣盡神仙一朝臥病無人識三春行樂在誰邊宛轉娥眉能幾時須  
臾鸛髮亂如絲但看舊來歌舞地唯有黃昏鳥雀悲

唐新語云希夷一名庭芝汝州人少有文華好爲宮體詩詞旨悲苦不爲  
時人所重善彈琵琶嘗爲白頭翁詠云今年花落顏色改明年花開復誰  
在旣而自悔曰我此詩讖與石崇白首同所歸何異乃更作一聯云年年  
歲歲花相似歲歲年年人不同旣而歎曰此句復似向讖矣然死生有命  
豈復由此乃兩存之詩成未周歲爲姦人所殺或云宋之問害之後孫翌

撰正聲集以希夷詩爲集中之最由是大爲人所稱

或云之問害希夷而  
以洛陽之篇爲己作

至今載此篇  
在之問集中

晚憩南陽旅館云旅館何年廢征夫此日過途窮人自哭春至鳥還歌行  
路新知少荒田古路多池篁覆丹谷墳樹遶清波日照蓬陰轉風微野氣  
和傷心不可去回首怨如何

秋日題汝陽潭壁云獨坐秋陰至悲來從所適行見汝陽潭飛蘿蒙水石  
懸瓢木葉上風吹何歷歷幽人不耐煩振衣步閒寂回流清見底金沙覆  
銀礫洛水非一丈空隴幾千尺魚鱗可憐紫鴨毛自然碧秋水弄清光渺  
焉忘損益遊山隨形影清濁混心迹歲暮歸去來東山餘宿昔

故園置酒云酒熟人須飲春還鬢已秋願逢千日醉得緩百年憂舊里多  
青草新知盡白頭風前燈易滅川上月難留卒卒周姬旦棲棲魯孔丘平  
生能幾日不及且遨遊

夜集張諲所居云江南成久客門館日蕭條唯有圖書在多傷鬢髮凋諸

生陪講誦稚子給漁樵隱室寒燈淨空階落葉飄滄州自有趣誰道隱須招

巫山懷古云巫山幽陰地神女艷陽年襄王伺容色落日望悠然歸來高堂夜金釭焰青煙頽想臥瑤席夢魂何翩翩搖落殊未已榮華倏徂遷愁思瀟湘浦悲涼雲夢田猿啼秋風夜鴈飛明月天巴歌不可聽聽此益潺湲

孤松篇云蠶月葉葉青鸞時柳花白澹艷煙雨滋敷芬陽春陌如何秋風起零落從此始獨有南澗松不歎東流水玄陰天地宜皓雪朝夜零豈不罹寒暑爲君留青青好顏色落在孤直羣樹遙相望衆草不敢逼靈龜卜真隱仙鳥宜棲息耻受秦帝封願言唐侯食寒山夜月明山冷氣清清淒兮歸風集吹之作琴聲松子臥仙岑寂聽凝野心清冷有直曲樵採無知音美人何時來幽逕委綠苔吁嗟深澗底弃捐廣厦材

鄭遂初



別離怨云蕩子戍遼東連年信不通塵生錦步障花送玉屏風只怨紅顏  
改寧辭玉簫空繫書春鴈足早晚到雲中

萬歲通天年李迥秀下登第

王熊

熊自潭州至岳陽張燕公宴別贈詩二章云絲管清且哀一曲傾一盃氣  
將然諾重心向友朋開古木無生意寒雲若死灰贈君芳杜草爲植建章  
臺

縉紳連省閣溝水遽西東然諾心猶在容華歲不同孤城臨楚塞遠樹入  
秦宮誰念三千里江潭一老翁

熊答云長沙辭舊國洞庭逢故人薰蘭敦久要披霧轉相親歲月方嗟老  
江山不惜春忽聞黃鸝曲更作白頭新

平生共風月倏忽間山川不期交淡水暫得款忘年興逸方罷釣帆開欲  
解船離心若危旆朝夕爲君懸

韋嗣立嘗和前作并序云余昔忝省闈與岳州張使君潭州王都督同官  
聯事後承朝譴各自東西張公與王都督別詩二首情頗感切余覽以耿  
歎因追和焉

詩見嗣立門

### 房融

遊始興廣果寺山房云零落嗟殘命蕭條託勝因方燒三界火遽洗六情  
塵隔嶺天花發凌空月殿新誰令鄉國思從此學分身

融河南人武后時爲宰相神龍元年貶死高州

### 張敬忠

先天中王上客爲侍御史自以才望華妙當入省望前行忽除膳部員外  
微有悵惋吏部郎中張敬忠戲詠曰有意嫌兵部專心望考功誰知脚踏  
蹬幾落省墻東蓋膳部在省最東北隅也

張仁愿在朔方奏用御史張敬忠何長鸞等分摠軍事太子文學柳彥昭  
爲管記義烏尉昆良正爲隨機皆著稱敬忠自監察御史累遷吏部郎中

開元七年拜平盧節度使

上客字未詳

崔珪

孤寢怨云征戍動經年含情拂玳筵花飛織錦處月落擣衣邊燈暗愁孤坐牀空怨獨眠自君遼海去玉匣閑春絃

珪開元中爲太子詹事與兄中書舍人琳弟光祿卿瑤俱列棨戟世號三戟崔家

沈祖仙

秋閨詩云白馬三軍客青娥十載思玉庭霜落夜羅幌月明時爐冷蜘蛛喜燈寒熠燿期愁多不可曙流涕坐空幃

盧崇道

新都南亭別郭大元振詩云竹徑女蘿蹊蓮洲文石隄靜深人俗斷尋玩往還迷碧潭秀初月素林驚夕棲褰幌納鳥侶罷琴聽猿啼佳辰改宿昔勝寄坐暎攜長懷賞心愛如玉復如珪

崇道爲太常卿坐其聳崔湜反俱流嶺南還歸至都爲其子娶崔氏女有  
內給使取充貴人崇道賂之令別娶一崔氏女入內事敗并男三人皆勅  
杖至殞蓋睿宗時也

徐安期

催粧云傳聞燈下調紅粉明鏡臺前作好春不須面上渾粧却留着雙眉  
待畫人

張紘

閨怨詩云去年離別鴈初歸今夜裁縫螢已飛征客近來音信斷不知何  
處寄寒衣

紘登久視六年進士第

薛曜

正夜侍宴應制云重關鐘漏通夕敞鳳凰宮雙日祥煙裏千門明月中酒  
盃浮湛露歌曲唱流風侍臣咸醉止常慙恩遇崇

曜尙城陽公主子紹尙太平公主紹兄顓懼太盛以問從兄克克曰帝甥  
尙主由來故事但以恭慎行之何懼也曜堂姪倣子鏞自曜至鏞一門四  
公主

曜元起之子也聖曆中附張易之官正諫大夫

袁暉

正月閨情云正月金閨裏微風繡戶閒曉魂憐別夢春思逼啼顏遶砌梅  
堪折當軒樹未攀歲華庭北上何日度陽關

七月閨情云七月坐涼霄金波滿麗譙容華芳意改枕席怨情饒錦字沾  
愁淚羅裙絨細腰不如銀漢女歲歲鵲成橋

二月閨怨云二月韶光好春風香氣多園中花巧笑林裏鳥能歌有恨離  
琴瑟無情着綺羅更聽春燕語妾亦不如他

三月閨怨云三春時將盡空房獨妾居娥眉愁自結鬢髮沒情梳

魏知古薦爲左補闕開元中馬懷素欲校正羣籍暉自邢州司戶參軍預

焉

明皇東巡回出雀鼠谷暉應制云魏國山河險周王警蹕迴九旗雲際出  
萬騎谷中來石岸行將盡煙郊望忽開賞矜垂柳拂春畏落花催興逸橫  
汾體恩褒作頌才小臣瞻日月延首詠康哉

李休烈

長壽三年則天徵天下銅五十餘萬斤鐵一百三十餘萬斤於定鼎門內  
鑄八稜銅柱高九十尺徑一丈二尺題曰大周萬國述德天樞紀革命之  
功貶唐家之德天樞下置鐵山銅龍負載獅子麒麟圍遶上有雲蓋上施  
盤龍以托珠高一丈圍三丈金彩熒煌光侔日月武三思爲其文朝士獻  
詩者不可紀惟李嶠詩冠絕當時曰轍跡光西嶮勳庸紀北燕何如萬國  
會諷德九門前灼灼臨黃道迢迢入紫煙仙盤正下露高柱欲承天山類  
叢雲起珠疑大火懸聲流塵作劫業固海成田聖澤傾堯酒薰風入舜絃  
忻逢下生日還偶上皇年後憲司發嶠附會韋庶人左授滁州別駕而終

開元中詔毀天樞發卒鎔鑠彌月不盡洛陽尉李休烈賦詩以詠之曰天  
門街裏倒天樞火急先須卸火珠計合一條絲線挽何勞兩縣索人夫先  
有訛言云一條線挽天樞言其不經久也故休烈詩及之士庶莫不諷詠  
天樞之北韋庶人繼造一臺先此毀拆

出大唐  
新語

### 邵士彥

秋閨詩云斜日空庭暮幽閨積恨盈細風吹帳冷微月度窗明怨坐啼相  
續愁眠夢不成調琴欲有弄畏作斷腸聲

### 吳大江

擣衣詩云沙塞秋應晚金閨恨已空那堪裂紈素時許出房櫳杵影弄寒  
月砧聲調夜風裁縫雙淚盡萬里寄雲中

### 劉幽求

幽求書懷云心爲明時盡君門尙不容田園迷徑路歸去欲何從

幽求冀州人臨淄王入誅韋庶人預參大策先天中爲相在同列下意望

未滿已而竇懷正崔湜附太平公主有逆謀幽求說明皇圖之謀洩睿宗  
流之於封州明年公主誅召復舊官開元初進左丞相以太子少保罷姚  
崇忌之奏幽求鬱鬱散職有怨言詔有司鞠治盧懷慎等奏幽求輕肆不  
恭失大臣體貶睦州刺史遷杭柳二州志憤卒於道

賈曾

洛陽人以孝聞開元初爲中書舍人與蘇晉同掌制誥時號蘇賈

曾孝和皇帝挽詞云新命千齡啓鴻圖累聖餘天行應潛躍帝出受圖書  
禮若傳堯舊功疑復夏初夢遊長不返何國是華胥

曾和宋之問下山歌云良遊晼晚兮月成紅錦路逶迤兮山路長王孫不  
留兮歲將宴嵩崑仙草兮爲誰芳

之問詩見王无競  
門紅字未詳

奉和春日出苑遊矚云彤闈晚闢問安迴金輅遊春博望開渭北晴光搖  
草樹終南佳氣入樓臺招賢已得商山客託乘還招鄴下才臣在東周獨

留滯欣承睿藻日邊來

時爲太子舍  
人使在東都



楊齊哲

過函谷關云地險峻函北途經分陝東逶迤衆山盡荒涼古塞空河光流  
曉日樹影散朝風聖德今無外何處是關中

魏元忠

侍宴銀潢宮應制云別殿秋雲上離宮夏景移寒風生玉樹涼氣下瑤池  
塹花仍吐葉嵩菌尙抽枝願奉南山壽千秋長若斯

元忠唐史有傳

李夔

夔爲汴州司戶使至汴州喜逢宋之問詩云阮籍蓬池上孤韻竹林才巨  
源從吏道正擁使車來相逢且交臂相命且銜盃醉後長歌畢餘聲繞吹  
臺

之問答曰遠方來下客輜軒揖使臣弄琴宜在夜傾酒貴逢春駟馬留孤  
館雙魚贈故人明朝雲雨散遙仰德爲鄰

司馬承禎

宋之問吟冬霄引贈承禎云河有冰兮山有雪比戶瑾兮行人絕獨山中  
兮對明月懷美人兮屢盈缺明月的的寒潭中青松幽幽吟勁風此情不  
向俗人說愛而不見恨無窮

承禎答云時既暮兮節欲春山林寂兮懷幽人登奇峯兮望白雲悵涵邈  
兮象郁紛白雲悠悠去不返寒風颼颼吹日晚不見其人誰與言歸坐彈  
琴思逾遠

承禎字子微事潘師正傳辟穀導引術無不通睿宗明皇累召至京師問  
其術卒贈正一先生沈佺期贈詩云紫微降天仙丹地授雲藻上言華頂  
事中間長生道華頂居最高大壑朝陽早長生術何妙童顏後天老清晨  
朝鳳京靜夜思鴻寶敍其被召之事也李白云余昔於金陵見司馬子微  
謂余有仙風道骨可以神遊八極之表因著大鵬賦以見志焉

唐詩紀事卷第十三

Blank page with vertical lines for text.

唐詩紀事卷第十四

張說

宋璟

王邱

崔翹

王光庭

席豫

梁昇卿

源乾曜

張嘉貞

盧從愿

韓休

徐知仁

崔禹錫

裴淮

章抗

程行誼

李暹

蕭嵩

劉昇

裴光庭

宇文融

崔沔

崔尙

陸堅

崔泰之

崔日知

魏奉古

張說

八日迎春賜綵花詩云別館芳菲上苑東飛花澹蕩御筵紅城臨渭水天  
河近闕對南山雲霧通繞殿流鶯凡幾樹當蹊亂蝶許多叢春園既醉心  
和樂共識皇恩造化同

送金城公主云青海和親日潢星出降時戎王子婿寵漢國舅家慈春野  
開離宴雲天起別詞空彈馬上曲詎減鳳樓悲

晦日澆水應制云千行發御柳一葉下仙筇青浦宸遊至朱城佳氣濃雲霞交暮色草樹喜春容藹藹天旂轉清笳入九重

餞唐州高使君云常時好閒獨朋舊少相過及爾宣風去方嗟別日多淮

流春晚晚江海路蹉跎百年屢分散言歡復幾何

已上四首  
中宗時作

說字道濟洛陽人相明皇爲文屬思精壯長于碑誌謫岳州後詩益悽婉人謂得江山助云

夜坐詩云懷哉四壁時未有五都價百金誰見許斗酒難爲貫落花生芳春孤月皎清夜復逢利交客題戶遙相謝

岳陽早霽南樓云山水佳新霽南樓翫初旭夜來枝半紅雨後洲全綠四運相終始萬形紛代續適臨青草湖再變黃鶯曲地穴穿東武江流下西蜀歌聞枉渚躡舞見長沙促心遠居無陋神和生自足白髮悲上春知常謝無欲

岳陽石門墨山二山相連有禪堂道觀天下絕境詩云困輪江上山近在

華容縣常陟巴邱首天晴遙可見佳遊屢前諾芳月愆幽眷及此符守移  
歡言臨道便旣攜賞心客復有送行掾竹徑入陰窅松崖上空蔭草共林  
一色雲與峰萬變探窺石門斷緣越沙澗轉兩山勢爭雄峰巘相顧盼藥  
妙靈仙寶境華巖壑選清都西淵絕金地東敞宴池果接園畦風煙邇臺  
殿高尋去石頂曠覽天宇徧千山紛滿目百川豁對面騎來雲氣迎人去  
鳥聲戀長揖桃源士舉世同企羨

岳州山城云山城豐日暇閉戶見天心東曠迎朝色西樓引夕陰觀書千  
載近學靜二毛深忽有南風至吹君堂上琴

岳州行郡竹籬云山郡不溝郭荒城無翳壅愛人忠主利義守閉爲勇苟  
非小勤瘁安得期逸寵板築恐土疎襄城嫌役重藩柵聊可固筠篁近易  
奉差池截浦沙繚繞緣隈隴羸似長雲互森如高戟聳預絕豺狼憂知免  
牛羊恐閭里寬矯步榛叢恣踏踵始果游處心終日成閒拱

出湖寄趙冬曦云西泛平湖盡參差入亂山東瞻岳陽郡汗漫太虛閒窳

步同行樂道文亦屢看山戍上雲桂江亭臨水關川途倏忽閒風景依如  
昨湘浦未賜環荆門猶主諾何時得余美載酒游宛洛

說謫岳州常鬱鬱不樂時宰以說機辨才略互相排擯蘇頌方大用說與  
壞善說因爲五君詠致書封其詩以貽頌誠其使曰當候忌日近暮送之  
使者近暮弔客至多說先公僚舊頌覽詩嗚咽流涕異日上對大陳說忠  
正謇諤人望所屬不宜淪滯遐方上因降璽書勞問俄遷荊州長史由是  
陸象先韋嗣立張庭珪賈曾皆以譴逐歲久因加甄敘頌以父之執友事  
之甚謹

五君詠

達志美類刺異或譏哀  
事顏氏之心也擬焉

齊公生人表迴天聞鶴唳清論早揣摩玄心晚超詣入相廊廟靜出軍沙

漠霽見深呂祿憂舉後陳平計甘心除君惡足以報先帝

魏元忠

許公信國楨克美具瞻情百事資朝問三章廣世程處高心不有臨節自  
爲名朱戶傳新戟青松拱舊塋淒涼丞相府餘慶在玄成

蘇瓌

李公實神敏才華乃天授睦親何用心處貴不忘舊故事遵臺閣新詩冠  
宇宙在人忠所奉惡我誠將宥南浦去莫歸嗟嗟蔑孫秀 李嶠

代公舉鵬翼翻飛摩海霧志康天地屯適與雲雷遇興喪一言決安危萬

心注大勳書王府舛命淪江路勢傾北夏門哀靡東平樹 郭元振

耿公山岳靈才傑心亦妙鷲鳥峻標立哀玉扣清調協贊休明啓思華日

月照何意瑤臺雲風吹落江徼湘流下潯陽灑淚一投弔 趙彥昭

王洽然上燕公書云詩曰投我以木瓜報之以瓊琚此言雖小可以喻大

相公五君詠曰淒涼丞相府餘慶在元成蘇公一聞此言移公于荆府積

漸至相由蘇得也今蘇屈居益部公坐廟堂投木報瓊義將安在亦可舉

蘇以自代然後爲朔方之行洽然書又曰相公岳陽送別詩云誰念三千

里江潭一老翁今日忘往日之棲遲貪暮年之富貴乎

明皇封泰山迴過金橋御路縈轉一望旌纛綿數十里上曰張說言我勒

兵三十萬旌旗徑五百里陝右上黨至于太原 見后碑真才子也召吳道子



韋無忝陳閔同製金橋圖

扈從南山雀鼠谷云豫動三靈贊時巡四海威破關凌曙出平路半春歸  
霍鎮迎雲罕汾河送羽旗山南柳半密谷北草全稀遲日移華蓋和風入  
夾衣上林千里近應見百花飛

將赴朔方軍應制云禮樂逢明主韜鈴用老臣恭憑神武策遠御鬼方人  
供帳榮恩餞山川喜詔巡天文日月送朝賦管絃新幼志傳三略衰材謝  
六鈞膽猶忠作伴心故道爲鄰漢保河南地胡清塞北塵連年大軍後不  
日小康辰劍舞輕離別歌酣忘苦辛從來思博望許國不謀身

說赴集賢院學士上賜讌應制得輝字韻云侍帝金華講千齡道固稀位  
將賢士設書共學徒歸首命深燕隗通經淺漢章列筵榮賜食送客愧儒  
衣賀鷲窺簷下遷鶯入殿飛欲知朝野慶文教日光輝

三相同日拜官奉和御制云大塊鎔羣品輕生偶聖時猥承三事命虛忝  
百僚師右揆謀華碩前星傅重資連騫求舊禮濫點樂賢詩賜釜同榮拜

擬金宴宰司菊花吹御酒蘭葉捧天詞寶曆休明盛頽年晷漏衰少留青  
史筆未便赤松期

恩賜宴樂遊園云漢苑佳遊地軒庭近侍臣共持榮幸日來賞豔陽春饌  
玉頽王筐擬金下帝鈞池臺草色徧宮觀柳條新花綬光連榻朱顏暢飲  
醇聖朝多樂事天意每隨人

醉中作云醉後方知樂彌勝未醉時動容皆是舞出語總成詩

雜詩云抱薰心常焦舉旆心常搖天長自地久歡樂能幾朝君看西陵樹  
歌舞爲誰嬌

宋璟

奉和明皇答張說南出雀鼠谷詩云秦地雄西夏并州近北胡禹行山啟  
路舜在邑爲都忽視寒暄隔深思險易殊四時宗伯敘六義宰臣鋪徵作  
宮常應星環日每紆盛哉逢合道良以致亨衢

奉和聖製送張尙書巡邊云帝道薄存兵王師尙有征是開司馬法爰命

總戎行畫闔崇威信分麾盛寵榮聚觀方結轍出祖遂傾城聖酒山河潤  
天詞象緯明德風邊地偃勝氣朔雲平宰國推良器爲君挹壯聲至和常  
得體不戰卽亡精以智泉寧竭其徐海自清遲遲廟堂坐贈別故人情  
奉和御製三相同日上官詩云丞相邦之重非才諒不居老臣庸且憊何  
德以當諸厚秩先爲忝崇班復此除太常陳禮樂中掖降簪裾聖酒山河  
潤仙文象緯舒冒恩懷寵祿陳力省空虛郭隗慙無駿馮諼媿有魚不知  
周勃者榮幸定何如

恩賜樂遊園宴詩云侍飲終醑會承恩續勝遊戴天惟慶幸選地卽殊尤  
北向祇雙闕南臨賞一邱曲江新溜暖上苑雜花稠疊疊韶絃屢戔戔賁  
帛周醉歸由畛陌榮耀接軒裘

開元天子登封泰山南出雀鼠谷張說獻詩明皇御答羣臣應制故明皇  
詩有川途猶在晉車馬漸歸秦之句錢張尙書朔方者燕公說也明皇詩  
有三台入武帳八座起文昌之句左丞相張說右丞相宋璟太子少傅源

乾曜同日上官錫宴東堂明皇賜詩有赤帝收三傑之句故蘇晉序云天  
子作三傑之詩以命宴樂蓋爲此也劉禹錫獻權舍人書曰昔宋廣平之  
沈下僚也蘇公味道時爲繡衣直指使者廣平投以梅花賦蘇盛稱之自  
是方列于聞人之目名遂振嗚呼以廣平之才未爲是賦則蘇公果暇知  
其人耶將廣平困于窮阨于躓然後爲是文耶是知英賢卓犖可外文字  
然猶用片言借說于先達之口席其勢而後驤首當時矧碌碌者疇能自  
異皮日休桃花賦序曰余嘗慕宋廣平之爲相貞姿勁質剛態毅狀疑其  
鐵腸石心不能吐婉媚辭然觀其文而有梅花賦清便富豔得南朝徐庾  
之體

王邱

奉和明皇答張說南出雀鼠谷詩云襟帶三秦接旂常萬乘過陽源淑氣  
早陰谷沍寒多花縟前郊仗霜嚴後秉戈戍雲開晉嶺江雁入汾河北土  
分堯俗南風動舜歌一聞天樂唱恭遂萬人和

邱字仲山擢童子科能屬文爲吏部侍郎典選其獎用如孫逖張晉明王洽然皆一時茂秀蕭嵩引與當國

邱盛推韓休休秉政薦爲御史大夫

撫言蕭穎士恃才傲物嘗攜壺逐勝憩于逆旅風雨暴至有紫衣翁領二僮避雨于此穎士頗侮之雨止老人上馬呵殿而去穎士始知爲邱也明日造門謝罪邱引至廡下坐而責之復曰子負名傲物其止於一第乎果終於揚州工曹

### 崔翹

奉和明皇答張說南出雀鼠谷詩云硤路繞河汾晴光掃曙氛笳吟中嶺樹仗入半峰雲頓覺山原盡平看邑里分早行芳草迴晚憩好風薰嘉頌推英宰春遊扈聖君共欣承睿渥日月照天文

翹官至禮部尙書清河公

### 王光庭

奉和明皇答張說南出雀鼠谷詩云省俗恩將徧巡方路稍迴寒隨汾谷  
盡春逐晉郊來雲騎傳行漏煙旄引從臺惠風初應律和氣正調梅雅頌  
通宸咏天文接曙台灞城桃李色應待日華開

奉和御製送張尙書巡邊詩云賢相德符充朝推文武雄海波先若鏡關  
草預從風鉞助將軍勇威成天子功瓊章九霄發錫宴五衢通玉輶龍盤  
帶金裝鳳頸驄虎貔紛儼儼河洛震熊熊戈劍千霜白旌旗萬火紅示刑  
夷夏變流惠鬼神同寇息軍容偃塵銷朔野空用師敷禮樂非是爲獯戎  
張說送光庭詩云同居洛陽陌經日嬾相求及爾江湖去言別悵悠悠楚  
雲渺羈翼海月倦行舟愛而不可見徒嗟芳歲流光庭與燕公最善故云

席豫

奉和明皇答張說南出雀鼠谷詩云鳴鑿初幸代簇蓋欲橫汾山盡千旗  
直郊平五校分前林已暄景後壑尙寒氛風送簫韶曲花鋪黼黻文鹽梅  
推上宰禮樂統中軍獻賦紆天札飄飄飛白雲

奉和聖製送張尙書巡邊詩云聖帝重兵權分麾屬大賢中軍仍執政丞相復巡邊翕習戎裝動張皇廟略宣朝雲承睿札野餞轉行旃亭障東緣海沙場北際天春冬見嚴雪朝夕候烽煙已勒燕山頌猶聞遣戍篇五營將月合八陣與雲連經略圖方遠懷柔道更全歸來畫麟閣藹藹武功傳豫字建侯年十六舉手筆俊拔科中之後爲中書舍人與韓休許景先徐安貞孫逖名相甲乙當時號爲席公帝嘗登朝元閣賦詩羣臣屬和帝以豫詩最工詔曰詩人之冠冕也

### 梁昇卿

奉和明皇答張說南出雀鼠谷詩云何意重關道千年遇聖皇幽林承惠澤閒客見清光日御仙途遠山靈壽域長寒雲入晉薄春樹隔汾香國佐同時雨天文屬歲陽從來漢家盛未若此巡方

昇卿與張九齡善涉學工書於八分尤工歷廣州都督書東封朝覲碑爲時絕筆

源乾曜

奉和御製送張尚書巡邊云匈奴邇河朔漢地復戎旅天子擇英才朝端  
出監撫流星下闔闔寶鉞專公輔禮物生光輝宸章備恩詔有征示矛戟  
制勝惟罇俎彼美何壯哉桓桓擅斯舉聲華振臺閣功德標文武奉國知  
命輕忘家以身許安人在勤恤保大殫襟腑此外無異言同情報明主  
送張說上集賢學士賜燕賦詩得迎字云盛業光書府徵人盡國英絲綸  
賢得相羣俊學爲名寵命垂天錫崇恩發睿情薰風清禁禦文殿述皇明  
日霽庭陰出池新水氣生歡娛此無限清酒自相迎

奉和御製賜三相同日上官云睿作超千古湛恩育萬人遞遷俱荷澤同  
拜忽爲鄰道合音徽暢芳融景命新鼓鐘崇享禮鸛鷺集朝倫竊位思官  
謗彫容謝木春慚多無以敘拙備實難陳進級懷三少承光盡百身自當  
歸第日何幸列宮臣

乾曜開元初姜皎薦於帝召見神氣爽澈占對有序帝悅之性謹重與張



嘉貞張說李元紘同秉政居中未嘗廷議可否較爲嘉貞所排得罪迄不  
申救君子譏焉

張嘉貞

奉和御製送張尙書巡邊云天錫我宗盟元戎付夏卿多才思命將必勇  
獨橫行經緯稱人傑文章作代英山川看是陣草木想爲兵不待河冰合  
猶防漢月明有謀當繫醜無戰是綏氓闔外專三略雲中冀一平感恩同  
義激悵別屢魂驚直視前旌掣遙聞後騎鳴還期方定日復此出郊迎  
嘉貞性簡疏與人不疑所薦中書舍人苗延嗣呂太一考功員嘉靖侍御  
史崔訓時語曰令君四俊苗呂崔員始爲中書舍人崔湜輕之後與議事  
正出其上湜驚曰此終其坐後十年而爲中書令

盧從愿

奉和御製送張說巡邊云上將發文昌中軍靖朔方占星引旌節擇日拜  
壇場禮樂臨軒送威聲出塞揚安邊俟帷幄制勝在巖廊作鼓將軍氣投

醪壯士觴戒途遵六月離贈動三光槐路清梅暑蘅臯赴麥涼持文仰雄  
伯耀武震遐荒衽席知無戰兵戈示不忘佇聞歌杖杜凱入繫名王  
從愿字子襲舉制科高第爲兵部尙書數充校考使御史中丞宇文融將  
以括田戶功爲上下考從愿不許乃密白從愿盛殖產占良田數百頃帝  
自此薄之目爲多田翁後欲用爲相屢矣卒以是止

韓休

奉和御製送張尙書巡邊云一德光台象三軍掌夏卿來威申廟略出總  
協師貞受鉞辭金殿憑軒去鼎城曉光搖組甲疏吹繞雲旌左律方先凱  
中鞏卽訓兵定功彰武事陳頌紀天聲祖宴初留賞宸章更寵行車徒零  
雨送林野夕陰生路極河流遠川長朔氣平南轅遲反旆歸奏謁承明  
休知制誥蕭嵩薦與同秉政帝重之

徐知仁

奉和御製送張尙書巡邊云聖德膺三統皇威被八埏大明均照物小醜

未寧邊國相台衡重元戎廟略宣紫泥方受命黃石乃推賢問罪陰山下  
安人屬國前度關行照月乘障坐銷煙北闕紆宸藻南橋列祖筵耀威當  
夏日殺氣指秋天鞞鼓鼉鼉振旌旗鳥獸懸由來詞翰手今見勒燕然

崔禹錫

奉和御製送張尚書巡邊云供帳何煌煌公其撫朔方羣僚咸餞酌明主  
降離章關塞重門下郊岐禁苑傍練兵宜雨洗臥鼓候風涼炎景寧云憚  
神謀肅所將旌搖天月迴騎入塞雲長赫赫皇威振油油聖澤滂非惟按  
車甲兼以正封疆叱咤陰山道澄清瀚海陽虜垣行決勝台座佇爲光  
禹錫字洪範登顯慶三年進士第爲中書舍人

裴淮

送張說上集賢學士賜讌賦得昇字云問道圖書盛尊儒禮教興石渠因  
學廣金殿爲賢昇日月恩光照風雲寵命膺謀謨言可範舟楫事斯憑宴  
喜明時洽光輝湛露凝大哉堯作主天下頌歌稱

灌與張說善說爲相數薦之灌長於敷奏天子亦自重焉

### 章抗

送集賢學士張說上官賜讌賦得西字云廣庭臨璧沼多士侍金闈英宰文儒協明君日月齊集賢光首拜改殿發新題早夏初移律餘花向拂溪壺觴接雲上經術引關西聖德鴻名遠將陪玉檢泥

抗終於刑部尙書所薦如梁昇卿王倕王壽俊皆爲顯人唐史稱之

### 程行誼

送張說上集賢學士賜讌賦得迴字云聖主崇文化鏘鏘得盛才相因歸夢立殿以集賢開象繫微言闡詩書至道該堯罇承帝澤禹善自天來禮洽歡逾長風怡暑更迴國朝將舜頌同是一康哉

裴子餘補鄆尉行誼與之同舍行誼以文法稱而子餘以儒顯長史陳崇業曰蘭菊異茱無可廢者二子卒子餘諡孝行誼諡正張說嘆曰二諡可無愧矣

李嵩

送張說上集賢學士賜讌得催字云偃武堯風接崇文漢道恢集賢更內  
殿清選自中台佐命留侯業詞華博物才天厨千品降夏旨百壺催鶴鷺  
方成列神仙喜暫陪復欣同拜首叨此頌良哉

蕭嵩

送張說上集賢學士賜讌得登字云帝曰簡才能旌賢在股肱文章體一  
變禮樂道逾弘芸閣英華入賓門鶴鷺登恩延過所望聖澤實超恆夏葉  
開紅藥餘花發紫藤微臣亦何幸叨此預文朋

奉和御製三相同日上官詩云審官思共理多士屬惟唐歷選台庭舊來  
熙帝業昌入朝師百辟論道協三光垂拱資元老親賢輔少陽登榮崇禮  
送寵德耀宸章御酒飛觴洽仙闈雅樂張荷恩思有報陳力愧無良願罄  
公忠節同心奉我皇

嵩開元初權中書舍人崔琳王邱齊澣以嵩少學術不以輩行許也獨姚

崇稱其遠到帝欲相蘇頲嘗夜密召嵩草詔其詞曰國之瓌寶帝曰朕不  
斥其父名卿當爲刊削沈思久之乃曰國之珍寶嵩出帝曰虛有其表嵩  
頲大多髭故帝有是言

劉昇

送張說上集賢學士賜讌得賓字云圖書應明主策府宴嘉賓台耀臨東  
壁乾光自北辰網羅窮象繫述作究天人聖酒千鍾洽仙厨百味陳成山  
徒可仰涉海詎知津幸逢文教盛還覩頌聲新

昇能文善草隸德威之後也開元中累遷中書舍人

裴光庭

奉和御製三相同日上官詩云樂賢聞往誥褒德偶茲辰端揆升元老師  
謀擇累仁紫庭崇讓畢粉署禮容陳旣荷恩榮舊俱承寵命新天文懸瑞  
色聖酒汎華茵雜選陳簫鼓歡娛洽搢紳掖垣招近侍虛薄廁清塵共保  
堅貞節當期雨露均

光庭字連城時爲兵部侍郎後爲相撰瑤山往則維城前規二篇獻之手製褒美詔皇太子諸王于光順門見光庭謝所以規諷意

宇文融

奉和御製三相同日上官詩云申甫生周日宣慈舉舜年何如偶昌運比德邁前賢寵獲元良密榮瞻端揆遷職優三事老位極百寮先北極迴宸渥南宮飾御筵飛文瑤札降賜酒玉杯傳謬列台衡重俱承雨露偏誓將同竭力相與効塵涓

融爲張說所惡欲先事中傷說張九齡謂說曰融辨給多詐公不可忽說曰狗鼠何能其後乃與崔隱甫廷劾說受賊事帝詔說致仕而出融詩有誓將同竭力相與効塵涓之語欣附說之辭也

融安輯戶口明皇賜詩張說奉和云聖德臨天下勞情徧九圍念茲人去本蓬轉將何依外避征戍數內傷親黨稀嗟不逢明盛胡能照隱微柏臺簡行李蘭殿錫朝衣別曲動秋風恩令生春輝使出四海安詔下萬心歸

愧無夔龍佐徒歌鴻雁飛

崔沔

恩賜樂遊園宴云五日醑初畢千年樂未央復承天所賜終宴國之陽地  
勝春逾好恩深樂更張落花飛廣座垂柳拂行觴庶尹陪三吏諸侯具萬  
方酒酣同忭躍歌舞詠時康

沔字善冲有文章舉賢良方正第一最受知于張說儉約自持嘗作陋室  
銘以見志云

崔尙

恩賜樂遊園宴云春日照長安皇恩寵庶官合錢承罷宴賜帛復追懽供  
帳憑高列城池入迴寬花催相國飲鳥和樂人彈北闕雲中見南山樹杪  
看樂遊宜締賞舞詠惜將闌

尙登久視六年進士第官至祠部郎中

陸堅



送張說上集賢學士應制得今字云聖主崇文教層霄降德音尊賢澤既厚式宴寵逾深復有夔龍相良哉簡帝心得人惟邁昔多士諒推今書殿榮光滿儒門喜氣臨顧惟誠濫吹徒此接衣簪

堅爲中書舍人以集賢學士或非其人而供儼太厚議白罷之張說曰麗正乃天子禮樂之司所費細而所益者大陸生之言蓋未達耶帝知遂薄堅

崔泰之

酬韋嗣立龍門北溪作云關塞臨伊水驪山枕灞川俱臨隱路側同在帝城邊謝公兼出處攜妓玩林泉鳴騶噴梅雪飛蓋曳松煙聞琴幽谷裏看奕古岩前落月低幃帳歸雲繞管絃叨榮慙北闕微尙愛東田寂寞灰心盡蕭條塵事捐朝思登嶮絕夜夢弄潺湲宿懷南澗意况覩北崑篇

同光祿弟冬日述懷序云韋祭酒張左丞二公竝廊廟偉才朝庭舊相咸光首和殊爲佳作輒繼陽春深增愧悚詩云吾族白眉良才華動洛陽觀

光初入仕應宿始爲郎飛螢翫書籍白鳳吐文章海卿逾往雅河尹冠前  
張擇才綏鄢郢殊化被江湘高樓臨廣陌甲第敞通莊別館邨山下疏亭  
洛水旁昌年賞豐陌暇日悅林塘衣冠皆秀茂羅綺盡名倡隔岸聞歌度  
臨池見舞行門庭寒變色槩戟自生光窮陰方黶黷殺氣正蒼茫感時興  
盛作晚歲共多傷積德章丞相通神張子房吟草編簪紱逸韻合宮商功  
名守留省濫跡在文昌家園遙可見臺寺近相望無庸乘侍謁有暇共韜  
翔棣華依雁序竹葉拂鸞觴水坐憐秋月山行弄晚芳恩榮慚服冕友愛  
篤垂堂無由報天德相顧詠時康

韋祭酒嗣立張左  
丞說光祿日知也

泰之時以禮部居洛故與嗣立說日知數有酬唱泰之知溫之子初以職  
方郎中預平二張終于工部尙書

### 崔日知

和韋嗣立龍門北溪作云夙齡秉微尙中年忽有鄰以茲山水僻遂得學  
通人迨我南京道聞君北業新崑前窺石鏡河畔踏芳茵旣憐伊浦綠復

憶灞池春連詞謝家子同歡冀野賓趣閒魚共樂情洽鳥來馴誰念昔遊者祇命獨留秦蕭條潁陽戀沖漠漢陰真無由陪勝躅空此翫書筠

冬日述懷奉呈韋祭酒張左丞蘭臺名賢云弱齡好經籍披卷卽怡然覃精四十載馳騁數千言孔壁探遺篆周章考絕編袁公論劔術孫子敘兵篇魯史君臣道姬書日月懸從師改炎燠負笈徧山川上異西河夏中非北海玄光榮拾青紫名價接通賢旣重萬鍾樂寧思二頃田長戟同分虎高冠亞附蟬晚懷重虛曠養志息雕鐫登高慚思拙匠物謝情妍不慕張平子寧希王仲宣誰謂登龍日翻成刻鶴年循循勞善誘軋軋思微牽琢磨才旣竭鑽仰德彌堅朽木誠爲諭捫心徒自憐終期吞鳥夢振翼上雲煙賦成先擲地詞高直揆天更執摠衣禮還趨函丈筵霧披槐市藹水靜璧池圓願逐從風葉飛舞翰林前

日知字子駿日用從父兄與張說同爲魏元忠朔方判官再遷洛州司馬譙王重福之變以功加銀青光祿大夫遷殿中少監日知在洛日與韋嗣

立張說酬唱故說和冬日述懷詩序云太極殿衆君子分司洛城自春涉  
秋日有遊訪崔光祿述志論文首貽雅唱諸公嘉德序事咸有報章若夫  
盛時榮位華景勝會此四者古難一遇而我輩實兼之嗣立亦序云僕忝  
臺閣早經聯事崔公以雅道自居未嘗至偃之室僕羸疾收退門堪羅雀  
公存訪不避風雨方知向時跡也今晨情也蘭菊春秋自芳竹柏歲寒不  
變故嗣立詩有昌年雖共偶歡會此難并爲憐漳浦曲沈痾有劉楨之句  
說詩云夫君邁前侶觀國騁奇姿山似鳴威鳳泉如出寶龜又曰紫綬拂  
三寺朱門臨九達其貴盛如此後爲太常卿自以處朝廷久每入謁必與  
尙書齒時謂尙書裏行後爲潞州長史卒初赴潞州明皇賜詩云潞國開  
新府壺關寵舊臨妙旌循吏德持悅庶民心蓋潞爲明皇舊鎮故也張說  
和云聖情垂曩鎮佳氣翊興王增戟雄都府高車轉太常川橫入澗闊山  
帶五龍長連帥初恩命天人舊紀綱餞塗飛御藻闔境自輝光明主招循  
吏何年下鳳凰

魏奉古

和韋嗣立龍門北溪作云有美朝爲貴幽尋地自偏踐臨伊水內想望灞池邊是遇皆新賞茲遊若舊年藤蘿隱路接楊柳御溝聯道愜神情王機忘俗理捐遂初誠已重兼濟實爲賢跡是山東戀心惟北闕前顧慚經拾紫多謝賦思玄未躡中林步空乘麗藻傳陽春和已寡扣寂意徒然龍門北溪韋嗣立山居在焉諸公賦詩奉古時預酬唱之末張說序崔韋贈答詩云二公述志論文首貽雅唱其餘尋聲響答望形影赴故亦峻碧池之漣漪增瑤林之沃若蓋奉古之徒是也